





DISSERTATIO MEDICA,
IN A U G U R A L I S,
D E

P A R A L Y S I .)

Q U A M,

ANNUENTE SUMMO NUMINE,

Ex Auctoritate Reverendi admodum Viri,

D. GULIELMI ROBERTSON, S. S. T. P.

ACADEMIÆ EDINBURGENÆ PRÆFECTI;

N E C N O N

Amplissimi SENATUS ACADEMICI consensu,

Et nobilissimæ FACULTATIS MEDICÆ decreto;

P R O G R A D U D O C T O R A T U S ,

SUMMISQUE IN MEDICINA HONORIBUS ET PRIVILEGIIS

RITE ET LEGITIME CONSEQUENDIS;

Eruditorum examini subjicit

T R E V O R U S J O N E S ,

CAMBRO-BRITANNUS,

Societ. Reg. Med. Edin. Sod.

Ad diem 24. Junii, hora locoque solitis.

E D I N B U R G I :

Apud BALFOUR et SMELLIE,

Academiae Typographos.

M,DCC,LXXX.

DISSERTATIO MEDICA,

INAUGURALIS,

DE

PARALYSSI.

CHARACTEREM hujus morbi sequentem a Cullenno illustrissimo in classe Neurosium, et ordine Comatum, traditum, adhibere decrevimus, eum cuilibet alii jure anteponendum ducentes. “Motus voluntarii nonnulli tantum imminuti, saepe cum sopore *.” Aliorum nosologorum definitiones silentio ex toto praeteribimus. Si quis eas velit videre, opera eorum adeat.

Hippocrates hunc morbum *Paralysin* tantum appellavit; alii vero auctores, pro natura affectus vel parte corporis laborante,

A

alia

* Synops. Nosol. Method. tom. 2. p. 192. edit. 1780.

alia ei nomina indiderunt, velut *Αναισθησιαν* cum sensus, et *Paralyfin* cum motus, sensu integro vel extincto, perditur; *Paraplegiam* vel *Paraplexiam*, cum partes universas infra cervicem invadit. Quantum vero hujus vocabuli sensum spectat, auctores inter se differunt. ‘Est summa,’ inquit Sauvagesius celebris, ‘debilitas sensus et motus, vel alterutrius in dimidio corporis transversim sumpti, vulgo extremorum inferiorum cum enuresi continua, anaphrodisia,’ &c. ‘Omnium est,’ inquit Vogelius, ‘partium sub collo, aut saltem medii corporis, artuumque inferiorum, paralyfis.’ ‘Sopor est,’ ut Linnaeus memoriae tradit, ‘constans partium sub thorace.’ ‘Est,’ ut ait Sagarus, ‘paralyfis artuum inferiorum, vel omnium artuum cum enuresi, anaphrodisia, quandoque et anaesthesia, ac marasmo.’ Characterem Vogeliani reliquis, cum exemplum utrumque satis designet, anteponendum ducimus. Alia nomina, quae species morbi a se invicem distinguunt, sunt *Hemiplegia* et *Paralyfis*

lysis localis. Reliqua nomina, quae paralyfi partium singularium soleant indi, ut longiora et nullius momenti, omittimus.

PHÆNOMENA MORBI.

Prima, quae se ostendunt, signa referemus, quae, quanquam sensus vel motus non prorsus aboleatur, partem tamen morbi constituere existimari possunt. Quantum ad curationem attinet, hoc non parum profuturum esse speramus.

Qui affectus primum notatur, is est aliquorum motuum a voluntate pendentium instabilitas. Si alterum latus tentetur, motus brachii pedisque ejus lateris instabiles sunt, et minus facile, quam alterius proprii, regi possunt. Recta antrorsum ambulare nequit aegrotus, sed latus affectum versus frequenter vergit, quamvis hoc vitare diligenter conatur. Manus ei tremit, nulloque motu accurate fungi valet. Exemplum
hujus

hujus luculentissimum in viro generoso vidi, qui, licet globulis eburneis ludendi fuerit peritissimus, pilam modice distantem dextra percutere non potuit, quanquam sinistra infueta hoc facile praestitit.

Haec nonnunquam in aliquot menses gradatim increfcere pergunt. Alia deinde paralyfis appropinquantis signa evidentiora se ostendunt, qualia sunt memoria tarda et verba enunciandi difficultas. Ægrotum brevi invadit paroxysmus apoplecticus, vel torpor universus, et alia signa postea dicenda.

Signa supra comprehensa notandi occasio nobis rarius subministratur; sed aegrotum de vertigine et capitis gravitate, stupore, et oblivione querentem offendimus. Has notas aliquando praecedat apoplexia. Protinus breviter amittitur certae partis, alterius plerumque lateris, motus. Sensum frigoris in latere vel parte laborante, aliquando tremorem et dolorem, saepius vero magnum torporem, qui nonnullis in exemplis ab initio usque adfuit, et ponderis sensum

sum queritur. Pulsus arteriarum sub initium saepe frequentes et inaequales, et nonnullis in casibus celeres et duri; plerumque tamen molles et tardi. Sitis interdum subest. Alvus fere semper dura. Corpus plerumque aridum, et sudor, cum movetur, semper viscidus, praesertim in parte laborante, quae eodem tempore signa contractionis manifesta habet, dum latus integrum spasmus afficitur *.

Non raro rapide titubanterque loquitur, praesertim si morbus sit hemiplegia, adeo ut ea, quae enunciet, nequeant intelligi. Pleraeque faciei partes, praesertim os distorquetur.

Cum morbus lenis est, aegrotus levatur, et nonnunquam, quanquam rarius, ex eo emergit. Caeterum plerumque pertinacior est, et, quanquam eo laborans aliqua ex parte levare potest, alteri tamen paroxysmo priore graviore obicitur, et morbus continuus evadit, nulla arte tollendus, immo morte saepe finitur.

In

* Hoffman. tom. 3. de resolutione nervorum.

In exemplis vero maxime communibus, morbus sub initium magis fixus est, et, prout progreditur, stupor, pallor, torpor, &c. incrementum, et paucis in casibus sensus ex toto aboletur. Interdum, cum sensus partis imperfectus manet, quasi punctiunculae lenes, repentes, una cum vellicationibus modicis convulsivis, subsunt. Dolores acuti nonnullos corripunt; quod tamen rarum esse opinamur *. Nonnunquam musculi flexores magnopere contrahuntur et rigescunt, ut demonstrant digiti tanta violentia, ut ungues volam penetrent, contracti. Aliquando tamen, sensu magis abolito, solida simplicia flaccida sunt, et in omnibus exemplis tactui frigida tabescunt. In stadio ultimo tumor oedematofus accedit. Ictus arteriarum, praesertim partis affectae, hoc tempore admodum molles.

Morbo etiam hunc in modum progrediente, aegrotus nonnihil levatur, et usum partium laborantium imperfectum sibi acquirit.

* Senac, de la structure du coeur, tom. 2.

quirit. Sermo intellectu facilius evadit, et partes faciei diversae minus distorquentur. Memoria judiciumque aliqua ex parte redeunt. Hoc in statu multos annos interdum vivit aegrotus.

C A U S A P R O X I M A.

Pauca prius physiologica et pathologica, quam hanc exponere, quod quidem in primis difficile, aggredimur, de systemate nervoso tradenda curabimus.

Systema nervosum sensus et motus organum est *, et omnes oeconomiae animalis functiones

* Cum veritate hujus, quod asseruimus, pugnare videntur sequentia, animalia, quibus cerebra morbida, valetudine, uti videtur, commoda fruuntur, classis animalium infima cerebro destituta; exempla quaedam foetuum † monstrosorum, capite cerebrove carentium, qui aliquandiu a partu vixerunt. Caeterum experimenta a Galeno ‡, et illustrissimo Monroio §, in ranas, &c. instituta, rem ita se habere clare demonstrant.

† Memoires de l'Acad. des Sciences, 1720.

‡ De Motu Musculorum.

§ Praelect.

functiones ab eo pendent. Omnes impressiones ad eam ejus partem, quae cerebrum appellatur, ante devehantur necesse est, quam ullam earum notionem, aut etiam notitiam, habere possumus. Utrum vero impressiones ad cerebrum universum, vel certam ejus partem tantum, hoc modo devehantur, nondum compertum habetur. Haec autem impressiones sentiendi potestas in cerebro subest, et inde in omnes corporis partes diffunditur. Cum sui generis sit, et animalibus vivis propria, eam in posterum Vim Nervosam appellabimus.

Nervi e substantia cerebri medullari conflantur; sed fibras evidentius ostendunt, quae pia matre separatim involutae sibi invicem, donec partem, cui destinantur, attingant, parallelae procurrunt. Inter progrediendum tamen, nonnunquam dividuntur, ramos dimittunt, vel per ganglia transeunt; quibus in exemplis, si fibras partis cujusque divisae excipias, parallelae esse cessant. Cum ad musculum, cui destinantur, accedunt, in
fibras

fibras * admodum exiguas innumeras dividuntur.

Ex observationibus † Monroii illustrissimi accuratissimis discimus, has modum in pulcherrimum esse convolutas, et maximam musculi partem conflare videri.

Si nervus sub originem, vel in qualibet alia sui decursus parte, comprimatur, vis nervosa non amplius per eum, donec causa tollatur comprimens, transit. Si pressura adeo diu, ut textura ejus deleatur, fuerit admota, in posterum ex toto perditur. An hoc filamentis nervi parallelis in eodem arcto contactu, quem fecit pressura, manentibus referendum?

Si nervi structura quolibet modo mutetur, idem incidit.

B

Pro

* Una harum, ut subduxerunt nonnulli, partem capilli communis $\frac{1}{311456}$ non excedit.

† Praelect. Hae observationes microscopio, quod sibi objecta circiter centies et sexagesies magnitudine vera majora reddidit, factae.

Pro affectibus cerebri diversis, vis ipsa nervosa diverse affici potest. Ita aliam magis, quam aliam, partem status ejus singularis excitare, et igitur exempla delirii diversa facere, valet.

Proximum est ut morbum ipsum consideremus. Eum pro affectu et sensus et motus habuerunt medici. Uterque saepe, quanquam nulla necessitate, conjungitur, et a similibus et iisdem causis non raro pendet. Jactura motus, sensu integro, subesse, et motus, sensu amisso, integer esse potest *. Paralysis, sensu superstite, absoluta esse potest, cum plerique medici, et character, quem adhibendum putavimus, per vocabulum *paralysis* motus muscutorum voluntati parentium jacturam tantum significant. Hinc jacturam cum motus tum sensus in eodem incidentem prorsus fortuitam esse apparet, quamvis Gaubius sagax id quod sequitur memoriae tradit: “ Exquisita dicatur,” nempe paralysis, “ si sensus una
“ cum

* Ill. Culleni Praelect. de Pathologia.

“ cum motu deest: Sin superest, imper-
 “ fecta *.”

Sensum et motum amissum separatim considerare non alienum foret. Incepto vero hujusmodi abstinendum, cum, ob systema nervosum parum intellectum, ea, quae motus tantum in alio exemplo, et sensus tantum in alio, jacturam faciant, difficillime, immo forsitan minime, comperire possimus. Et hunc et illum amissum actioni causarum remotarum potentiori tribuendum ducimus. Motum igitur amissum tantum, et paucis, exequemur, cum causas universas debilitatis, et hujus gradus diversos, plenius investigare nos ab incepto longius traheret.

A causis paralyſis considerandis incipiemus. Hæc, Gaubio judice, ad tria capita redeunt: ‘ Debetur multiplici vitio: 1. Cerebri, cerebelli, medullae oblongatae, spinalis, nervorumque inde porrectorum in truncis, gangliis, ramulis suis; quo fit, ut vis nervea torpeat, deficiat, aut, sublato
 ‘ istarum

* Gaub. Pathol. §. 752.

‘ istarum partium cum fibris motricibus
 ‘ commercio, intercipiatur : 2. Systematis
 ‘ circulationis, quo influxus humorum vi-
 ‘ talium in organa motus imminuitur, suf-
 ‘ flaminatur : 3. Villorum denique muscu-
 ‘ larium labi propriae, distractione, pressio-
 ‘ ne, diuturna quiete, intensiore actione,
 ‘ relaxatione, siccatione, texturae alienatio-
 ‘ ne, inductae, qua ad motum inhabiles
 ‘ redduntur *.’

Utrum hic Gaubius vitia systematis mul-
 tiplicia esse asserere necne velit, statui nequit.
 Duo vero neminem, qui medicinam facit,
 latere debent, unum a virtute motrici ex-
 tincta vel collapsu †, alterum a compres-
 sione, vel talibus cerebri affectibus organi-
 cis, quales exercitationem potestatis nervo-
 sae,

* Gaub. Patholog. § 753.

† Cullenus celeberrimus hoc vocabulum non ali-
 quid explicandi, sed statum rerum minime dubitanda-
 rum certum significandi, tantum consilio adhibet ‡.
 Idem omnino hac in dissertatione significabit.

‡ Physiolog. §. 130.

fac, vel flatum cerebri excitatum, impediunt, pendens.

Quomodo Boerhaavius et Gaubius vitium circuitus sanguinei pro causa paralyfis habeant, non intelligimus; deliquium enim animi prius oritur, deinde status paralyfis, qui non loco proprius est, sed universas systematis fibras musculares invadit. Utrum hic sine illo unquam necne moveatur, nondum compertum. Hoc nunquam quidem incidere opinor. Nonnulli aortam vinctam paralyfin artuum inferiorum facere ponunt. Qua ratione vero hoc agat, utrum musculos an medullam spinalem afficiat, statuere possumus? Sanguinem igitur nihil aliud, quantum ad systema nervosum attinet, praestare, quam id sanum et integrum gradum caloris et tensionis ei idoneum comparando, fervare concludimus.

Cum paralyfis operationi aneurismi arteriae brachialis causa institutae succedit, fluxus sanguinis in brachium impeditus paralyfin facere fuit existimatus. Caeterum,
in

in duobus hoc genus exemplis *, aegroti motum sensumque brachiorum recuperarunt, et, cadaveribus annos post triginta incisis, nervos una cum arteriis fuisse ligatos, et muneribus fungendi per duos nodos, ganglia referentes, ad partem ubi vinctae fuerunt formatos, potestatem sibi adeptos repertum.

Insuper, in exemplis, ubi paralyfis ab arteriis vinctis proficiscitur, morbus post aliquantum temporis tantum et semper tarde accedit. Tensio et calor primum imminuuntur, et, brevi postquam paralyfis invasit, brachium gangraena corripitur. Hinc cogimus sanguinem nihil aliud quam calorem musculi et tensionem servare.

Vitia fibrarum muscularium pro causis paralyfis forsitan non debent haberi. Multa eorum tamen nimia tensione, &c. musculum, potestatem ei insitam forsitan perdendo, adeo debilitant, ut eum, in quem vis animalis agat, parum aptum efficiant.

Cullenus

* Molinelli comment. academ. Bonon. t. 2. p. 2.

Cullenus * quoque celeberrimus causas paralyfis ad tria capita reduxit : 1. Ad statum collapsus in cerebro, statui somni non abfimilem. 2. Ad has causas, quae commercium originem nervorum inter et musculos corporis diversos interpellant. 3. Ad causas jacturae potestatis fibris muscularibus ipsis insitae diversas.

Phaenomena et pathologia jam tradita, natura causarum remotarum sedans, effectus stimulantium in curatione adhibitorum manifesti, et experimenta in ranas aliaque animalia instituta, plane demonstrare videntur, defectum potestatis nervosae vel ab eo ejus statu, qui collapsus vocatur, vel a motu ejus a cerebro ad partem laborantem impedito pendentem, pro causa hujusce morbi esse habendum.

De hac modo sequente loquitur Gaubius illustris. ‘ Horum singula seorsim, aut
‘ plura simul, sive ipsam extinguant virtutem
‘ motricem, sive conditiones saltem tollant,
‘ sine

* Vid. Patholog.

‘ sine quibus illa in motus consentaneos excitari nequeat, utroque modo paralyfin fieri necesse est *.’

Boerhaavius vero inquit, ‘ Causa hujus proxima † semper impeditus fluor liquidi nervosi a cerebro in musculum paralyticum vel liquidi arteriosi in eundem.’ Opinione autem Boerhaavianam posteriorem, ob causas supra positas, repudiamus.

Causam proximam executi, rationem signorum hic redderemus, nisi haec e pathologia, causisque remotis mox tradendis, satis intellectum iri putaremus.

CAUSÆ REMOTÆ.

Causae paralyfis remotae sunt eae, quae homines morbo opportunos efficiunt, quaeque eundem excitant, et ab apoplexiae propriis non differunt, gradu tantum minores.

Quanquam

* Patholog. sect. 753.

† Aphorism. 1058.

Quaquam omnis aetas paralyfi patet, eos, qui circiter annos sexaginta habent, frequentius invadit. Qui ad morbum proclives sunt, in iis signa sequentia se ostendunt: Caput amplum, cervix brevis, pinguedo, habitusque plenus; quibus adjici possunt vita iners, sedentaria, luxuriosa, ebriositas, multus somnus, vigiliae longae et frequentes, studium immodicum, et omnia denique quae systema nervosum debilitant.

Frequentius tempestate admodum frigida et humida *, quam calida et sicca, incidit. Hinc autumnus, hyems, et initium veris ei, quam alia anni tempora, magis favere putantur. Hippocrates † una hyeme paralyfin adeo saepe offendit, ut eam epidemice grassari putaverit. Caelius Aurelianus ‡ aliique scriptores tempestatibus supra positis eam circumscripserunt.

Causae excitantes duas ad classes redeunt. *Prior* ea, quae vim cerebri imminuunt, eamque ejus conditionem, quam *col-*

C

lapsum

* Cels. lib. 2. cap. 1. Huxh. de aëre et morbis epidemicis, an. 1730, 33, 34, 35, 37. † Epidem. 1.

chart. tom. 9. ‡ Lib. 2. cap. 1.

lapsus appellavimus, faciunt ; *posterior* ea, quae potestatem nervosam per nervos de-
vehi impediunt, comprehendit.

Quae collapsum faciunt, ea vel directe vel indirecte, si ita loqui liceat, agunt. Causae directe agentes sunt ea, quae mobilitatem vel actionem systematis nervosi diminuunt, quaeque magis liberaliter applicata eam ex toto extinguunt. Hoc in exemplo, effectu nullo prius edito, mors saepe infertur. Potestates hujusmodi sedantia vocantur.

Sedantibus potentissimis adnumerandum est frigus intensum, quod, si diu applicetur, potestatem nervosam omnino perdit, mortemque facit, ut, hyeme frigidissima, saepe videmus. Multa exempla, ubi certo loco admotum paralyfin parti intulit, unumque nuperrimum, habemus. Mulier, loco honesto nata, quae ante biennium aut circiter maritum ad Americam belli, quod ibi nunc geritur, causa euntem comitata est, Novi Eboraci, gelu intensissimo, peperit. Paucis

a partu diebus aliquamdiu dormivit, altera manuum stragulis non operta, quae ei experrectae sensu motuque carebat et adhuc paralyfi laborat. Nonnullos, propterea quod saxo frigido infederant, sphincteris ani et vesicae paralyfi subito correptos fuisse, refert Galenus. Multa quoque alia sunt, quae eodem valent.

Frigus, si humori adjungatur, potentius agere reperitur. Hoc exhalationi humiditatis e corpore calorem ejus imminuenti referendum esse experimenta probant *.

Qui affectus animum contristant, velut terror, metus subitus, et moestitia, ii omnes collapsum potenter inducunt, immo mortem nonnunquam faciunt. Hoffmannus, De Haen, et Schenkius multa hoc genus exempla memoriae tradiderunt.

Aër mephiticus, qui olim *gas sylvestre* fuit appellatus, experientia teste, vim cerebri imminuit, et e natura ejus exposita omnibus animalibus, quae spiritum trahunt,
eum

* Vide Physical and Literary Essays, vol. 2. art. 7. pag. 145.

eum ex aequo nocere novimus. Si quis eum inspiret, et non protinus in aërem purum removeatur, repente extinguì confuevit. Spelunca aut Grotto del Cane in Italia hoc fluido adeo abundat, ut canes et omnia alia animalia humiliora, cum primum eam ingrediuntur, quod corpora eorum hoc in fluidum immerguntur, vita priventur. Homo, contra, et alia animalia magis procera, in eam impune longius progredi possunt, quod aër mephiticus, atmosphaerico gravior aequè celeriter, ac marginem superat, effluit, se undique diffundens, non tamen eo altius sese attollens.

Fermentationem subeuntia et ardentia magnas hujus fluidi quantitates praebent. Quinetiam venenum e pulmonibus animalium excernitur, quod aëre atmosphaerico dissolvitur, uti e corpore expellatur. Unde aër purus in pulmones semel receptus, dotes, aëris mephitici proprias reddentes, sibi adipiscitur*. Cum vero aër communis
certam

* Praelect. celeb. Black de Chemia.

certam tantum veneni quantitatem possit dissolvere, novum illius supplementum omnino necessarium. Quod si deest, venenum ea quantitate, ut exitio sit, accumulatur.

Stupor, coma, et apoplexia, quae hoc fluidum tam saepe movet, id, mobilitatem systematis nervosi perdendo, agere demonstrant. Cum animalia, quae apoplectica vel paralytica eo fuerint reddita, facilitate solita spirare pergant, id in sensorium commune, et non in bronchia cellulasque pulmonum, ut auctoribus placuit nonnullis, agere concludere licet. Non desunt quidem medici hodierni, qui hoc fluidum, in pulmones inhalatum, in auxilium phthisis pulmonalis promptum esse contendunt.

Fumi sulphuris ardentis, plumbi, mercurii, arsenici, antimonii, &c. eandem naturam habere, in nervos olfactorios agere, vimque nervosam, statum collapsus inducendo, extinguere videntur. Qui in his metallis effodiendis, fundendis, &c. occupantur, potissimum inauratores, ii in primis

mis apoplexiae et paralyfi objiciuntur. Plumbum acidis corrosum potestatem nervosam potenter imminuit.

Venena narcotica vim nervosam non minus efficaciter perdunt, quam causae modo comprehensae. Praecipua autem illorum sunt, opium, cicuta, belladonna, hyoscyamus, mandragora, nicotiana, solanum, stramonium, laurus, et alochol. Cum actio omnium horum fere eadem sit, de opio solo fufe dicemus.

Hoc vim stimulantem an directe sedantem habeat, nondum compertum esse videtur. Vis imaginandi vegeta et hilaritas, quae opium liberaliter adhibitum nonnunquam excipiunt, potestatem ei inesse stimulantem indicant. Gravis stupor, contra, somnolentia, insensibilitas, frigus, et debilitas, quae signis supra positis brevi succedunt, et praesertim quod ad mortem usque increpiscunt, potestatem sedantem ei non deesse, clare evidenterque testantur.

Venena narcotica paralyfin movere, multa documenta, praesertim in experimentis

mentis virorum admodum celebrium Monroii et Whyttii, habemus. Haec quidem corporis extrema, vel quamlibet aliam infra eam, cui admota fuerunt, partem facpius affici ostendunt.

Si sedantia modo agendi suo differunt, hoc tantum plus minusve potestatis stimulantis, antequam sedans incipit apparere, ostendendo praestant. Ita alcohol magis, quam opium, stimulare existimari potest; sed omnem systematis nervosi actionem aequae potenter extinguit. Exemplum hoc genus in homine, qui nihil aqua fortius bibere assuetus est, insigne vidi. Hominem, quo cum amicitia ei intercessit, forte offendit, et cum eo, spatio quindecim minutorum circiter octo novemve, liquoris spirituosius e saccharo extracti uncias potavit. In eum subito invaserunt gravis stupor, insensibilitas, ad somnum proclivitas, stertor, &c. quae ad vespere diei secundi cum fato concessit, increverunt.

Celsus, et auctores quoque recentiores, venerem immodicam pro causa paralyfis habent.

habent. In eandem sententiam concedit Tiffotus, qui mastuprationem morbum facere opinatur.

Alia paralyfis causa, si observationibus auctorum fides habenda, est materia, quae vel extrinsecus in corpus invehit, et eadem esse ac contagio specifica in morbo venereo, exanthematis, &c. vel in corpore ipso, ut in arthritide et scrophula, generari potest. Insuper, materia hujusmodi in gangraena et sphacelo pro certo progeneratur, et ex ulceribus mali moris vel cancris absorberi potest. In multis ex his exemplis materia absorpta, in systema nervosum protinus agendo, statum collapsus videtur inducere.

Causae paralyfis indirecte agentes sunt eae, quae potestatis nervosae excitationem adaugent; quod facit ut cerebrum et systema nervosum in statu debilitatis relinquantur, e quo difficulter emergunt. Hae potestates nominantur stimulantia. Affectus animi excitantes, ut ira et gaudium, et paralyfin et mortem etiam inferre consue-
runt.

runt. Hos prius excitare, deinde collapsum facere, clare testantur pulsus arteriarum constanter frequentes, rubor faciei, epistaxis, quae nonnunquam subest. Insuper, signa duo posteriora eos quantitatem sanguinis insolitam ad caput mittere, et effusionem vel rupturam facere posse, demonstrant.

Labor longus, praesertim violentus, et nifus nimis magni potestatem nervosam excitatione nimia perdere, vel rupturam facere possunt.

Aromata sunt stimulantia fortiora, et, liberaliter adhibita, vires ventriculo convellunt, statumque collapsus progignunt.

Quae potestatis nervosae cursum quolibet modo impediunt, ea ad classem causarum secundam relegamus.

E cadaveribus incisis discimus, pressuram cerebrum afficientem, et motum potestatis nervosae, ex eodem in nervos commerciumve tantum, quod inter partes cerebri diversas intercedit, et ad functiones ejus exercendas omnino necessarium est, impedientem paralyfin saepe movere. Nulla alia enim

ratione, quomodo pressura stuporem, aliaque magni collapsus signa, faciat, vel corpus, pressura sublata, ad sanitatem reducatur, potest exponi.

Exempla pressurae varia sunt. Externa esse potest, et a fractura vel parte cranii introrsum pressa, vel a vertebra luxata medullam spinalem urgentibus, proficisci. Interna quoque est, ab exostosis vel tumoribus, nimia distensione, sanguine per rupturam vel anastomosis, quod haemorrhagia cerebri apud Hoffmannum appellatur, vel sero in superficie cerebri, vel intra ventriculos ejusdem effuso, oriens,

P R O G N O S I S.

Eventus hujus morbi plerumque infaustus est, semper dubius. Si stupor, somnolentia, insensibilitas, frigoris sensus maneant, et praesertim si multum aetatis aegroto accesserit, vel pars paralytica emacietur, vel oedemate

oedemate afficiatur, spem salutis non multam affulgere, pro certo possumus affirmare. Morbum vero, contra, periculo ex toto vacare dicere non audemus, licet aeger juvenis sit, parsque laborans magnitudine non imminuatur, licet morbus a congestione proficiscatur, nullaque humorum effusorum signa subsint, licet sensus nulla ex parte amittatur. Quanquam sanguinis missio notas praecipuas sustulerit, et aegrotus morbi immunis aliquamdiu fuerit, exitum tamen felicem fore non fidenter promittendum.

RATIO MEDENDI.

Oeconomia animalis modusque vitiis ejus occurrendi accurate considerata, artem medicam tantum abesse, ut perfectionem attingerit, ut, contra, admodum manca sit, evidenter demonstrant. Exemplum hujus, proh dolor! nimis luculentum in uxore, qua nihil unquam amabilius excellentiusve fuit,

fuit, viri admodum reverendi Roberti Carter Thelwall, mihi in primis amici, se nuper ostendit. Omni felicitate, quae mortalibus solet contingere, fruens, suos diligens et ab illis, non sine causa gravissima, miro amore dilecta, alterius capitis lateris dolore correpta est. Licet hic nonnihil sublatus; tantus tamen stupor et somnolentia eam invaserunt, ut nec stimulantia, nec quodlibet aliud remedium morbum potuerit depellere, quanquam signa aliqua ex parte levarunt. Hoc casu funesto, multumque semper deplorando, et multis quos viderim aliis inductus medicinae impotentiam non execrari non possum.

Ad inceptum vero redeamus. Consilia autem medendi tria sunt:

I. Morbo, cum seminium vel signa atoniae se ostendunt, occurrere.

II. Congestionem et plenitudinem tollere.

III. Cursum potestatis nervosae liberum reddere.

Quantum

Quantum primum confilium fpectat, ei respondent fequentia: A. Caufas remotas tollere. B. Tonum et vigorem fyftematis nervofi fufcentare. C. Compreffioni occurrere.

A. Cum caufae remotae corpori externo applicantur, protinus funt tollendae. Hoc multis in exemplis morbo occurret.

B. Caeterum, cum morbus a potestatis nervosae defectu pendet, tonum hujus et vigorem fufcentare difficilius erit. Hoc tamen forfitan praestabunt: a. Diaeta valens et nutriens. Qui cibus hoc in casu idoneus est, is ad putredinem minime proclivis et parum stimulat. Quanquam diaetae ex toto vegetabili nonnulla objici poffunt; e feminibus tamen farinaceis et lacte, utpote quae plurimum nutriant fatisque roborant, potiffimum conficiatur fuadeo. Singulis diebus aliquantum cibi animalis dari potest. Nec adiposum fit, nec quantitate nimium. Caro bubula et ovilla forfitan, utpote quae magis perfpirabilis fit, carni
anima-

animalium juniorum, avibus piscibusve, anteponenda.

Non aegroto usu vini interdicerem, praesertim si aetate provectus eive insuetus sit. Quantitas consuetudine aegroti regenda. Quod vinum optime convenit, id est rubrum Lusitanum, vel Maderense, cui ad minimum admisceatur aequa aquae quantitas. Idem dilutius illi pro potu communi esse potest. Si vero non multum aetatis aegroto accesserit, et vinum vel liquores spirituosos bibere parum insueverit, melius forsitan foret his ex toto abstinere, et aliquod diluens mite, quale est aqua simplex, vel lacti admista, vel aliqua herba aromatica, velut melissa, imbuta, pro potu communi adhibere.

b. Calor et corporis universi, et partis affectae potissimum, summa cura sustentatus. Hoc praestat actionem cordis et arteriarum, praesertim superficiei propriarum, promovere: *α*. Diaeta idonea, qualis supra fuit comprehensa. *β*. Exercitatione singulis diebus in tres quatuorve horas adhibita, quae

quae vel equitare, vel rheda aperta, laminis ferreis elasticis nullis vel brevissimis sustentata, vehere esse potest: γ. Frictione vespere et mane per spatium horae diutiusve adhibenda.

Facilitas, qua cutis nonnullorum inflammatur, et epidermidem amittit, ne frictio verriculo, vel etiam panno laneo fiat, saepe cavet. Huic vero incommodo, ut expertus sum, efficaciter occurrit aliquantum panni lanei corpori arcte circumdatum. Si in loco, cui applicatur, rite figatur, verriculum libere huc illuc moveri potest. Quinetiam partes, quae non verriculo subjacent, a frigore defendit.

Cum balneum frigidum corpori vires conciliet, et actionem vasculorum extremorum potenter moveat subito adhibitum, ad id hoc in exemplo hos effectus edendi consilio confugi potest. Aqua corpori semper affundenda. Temperies ejus ad minimum gradum thermometri Fahrenheiteani quinquagesimum adaequet, et sexagesimum plerumque non excedat. Nonnullis

nullis in casibus multo calidior esse potest. Hoc autem memoria semper tenendum, non ad lavationem frigidam decurri oportere, nisi aegrotus ea jam insueverit, nisi ruborem totius corporis superficiei et calorem excitaverit, et corpus vegetum animumque hilarem reddiderit, nisi omnia inflammationis signa sublata fuerint. Si aegrotus, contra, ea nunquam ante fuerit usus, si aquam aliqua ex parte reformidet, si affusionem excipiant pallor superficiei, sensus frigoris, rigor, ea, ut remedio periculosissimo, semper abstineatur.

c. Mobilitas systematis nervosi conservata. Ad hanc autem illaefam servandam, conferunt remedia supra comprehensa, et sequentia diligenter vitata, omnes evacuationes nimis liberales, velut sanguinis detractio, alvi purgatio, sudatio, venus nimia, exercitatio violenta, defatigatio, cogitatio studiumve intensius, affectus animi concitatiores, vigiliae, multus somnus.

C. Ut compressio hoc in exemplo tantum ea esse potest, quae ab effusione vel haemorrh-

haemorrhagia oritur, ita ei non aliter, quam plenitudinem et congestionem fugiendo, et omnia quae liberum sanguinis a capite descensum impediunt removendo, occurrere possumus.

Consilio alteri respondent, missio sanguinis universa locove propria, viribus aegroti temporisque morbi accommodata, epispastica, alvus modice fusa servata, regimen antiphlogisticum.

Consilio tertio accommodantur:

A. Cursum quem tenent nervi, quolibet obstaculo liberare. B. Compressionem cerebri tollere. C. Potestati nervosae vigorem et mobilitatem reddere.

A. Cursum quem tenent nervi, quolibet obstaculo liberare.---Hoc autem nervus divisus, natura portiunculae mutatus, compressus esse potest. Cum vitia duo priora suam per naturam, quantum noverimus, insanabilia sint, ea silentio fere praetereamus oportet. Hoc tantum notamus, nervo diviso, si partes non protinus conjungantur, primoque, uti aiunt, consilio sanen-

E

tur,

tur, potestas nervosa non amplius per eum descendere potest. Immo nervus ad sanitatem pro votis reductus raro munia sua, et nunquam nisi longum post tempus, obire valet. Vitio posteriori medetur causa comprimens sublata, ossa, ex. gr. luxata et fracta in locum reducta, tumores, cum tuto fieri potest, extirpati. Si viam hoc faciendi discere velis, chirurgorum opera adeas.

B. Compressionem cerebri tollere.----
Cum pressura a congestione et plenitudine proficiscitur, sanguis parcius copiosiusve, pro viribus aegroti, protinus mittendus. Si prima detractio signa non satis levet, et pulsus arteriarum pleni validique maneant, altera sanguinis quantitas, sex octove horis elapsis, vel vena incisa, vel cucurbitulis cruentis temporibus admotis, mittenda. Tertia sanguinis detractio admodum caute adhibenda, et loco propria tantum forsitan esse debet.

Utrum sanguinem e collo vel e brachio, in paralyfi depellenda, emittere magis conveniat, ambigo. Caeterum, ut hoc illi anteponam

ponam animus admodum inclinatus, nec, incisione ampla facta, commodum minus fore duco. Si vero plus levaminis a vena jugulari, quam a brachii propria incisa, oriri concedatur, nonne fascia illi postea arcte admovenda, sanguinem intra caput nimis coercendo, effectus prave edet, qui loci discrimine minime possunt pensari? Regimen antiphlogisticum praecipuum, viribus aegroti et vigori accommodandum. Admodum stricte hoc adhibere raro necessarium evadet.

Epispastica, setacea, fonticuli, utpote quae plenitudinem imminuant, proderunt.

Cathartica, et plenitudinem universam et vasorum capitis propriam tollendo, et intestina etiam, praesertim rectum, a stercore indurato libera servando, quod sanguinem artus inferiores libere adire et inde redire patitur, in morbum non parum poterunt. Magnum sanguinis impetum, stercore indurato aortam descendantem venamque cavam premente, ad caput nonnunquam fieri, testantur faeces durae foras expulsae, nonnullos

nullos capitis dolores subito levantes. Circuitus igitur sanguinis, in artubus inferioribus nullis obstaculis obiectus, cursum ad caput imminuit, et igitur admodum utilis.

Quae cathartica hoc in morbo cum comodo adhibentur, ea numerosa sunt. Caeterum, in consilium proxime positum optime accommodatur aloe. Aliis vero consiliis melius respondent ea, quae evacuationem majorem faciunt, et, ob intestinorum insensibilitatem, quae in paralyfi invalescit, quantitatis praeter consuetudinem magnis sunt assumenda. Dari possunt, oleum ricini, pulvis jalapii compositus, infusum fennae, et compluria alia. Cum enemata pessive retineri possunt, ad hos et ad illa confugere saepe non alienum erit.

Quinetiam congestio cursum humorum ad artus inferiores, per pediluvia et vestitum pedum calidiorem faciendo, caput truncumque corporis, praesertim illud, magis quam extrema, elevando, et eodem tempore omnia quae impetum sanguinis ad caput movent, et plenitudinem augent, vi-

tando,

tando, removeri potest. Hinc liquores fermentati et spirituosi, et plerumque, eandem ob rationem, emetica parum idonea.

Cum pressura a sanguine serove ob plenitudinem effuso proficiscitur, eadem remedia, quae in congestione, conveniunt. Caeterum, in iis exemplis, ubi effusio a laxitate exhalantium adaucta oritur, raro vel nunquam idonea. In exemplis hoc genus, sanguinis detractionem, et purgantia drastica admodum perniciofa fore, manifestum. Epispastica capiti applicata, et fetacea cervicis, praecipua remedia esse videntur, quae adhiberi possunt. His ea remedia adjungas, quae absorptionem faciunt, qualia sunt tonica et astringentia.

Quaedam compressiones ab exostosis cranii, membranis naturam osseam induentibus, tumoribus harum substantiaeve cerebri, et abscessibus ortae, nihil curationis a medicina recipere possunt. Igitur aliquid super his in medium proferre supervacaneum.

Omnia exempla, quae a violentia externa pendent, cum chirurgorum sint, non nostrum exequi ducimus.

C. Potestati nervosae vigorem et mobilitatem reddere.---Hoc statum collapsus spectat, et forsitan remedia diversa, prout collapsum fecerunt, causae directae vel indirectae, nos praecepturos esse expectabitur. Caeterum, omnibus inflammationis signis remotis, collapsus in utroque exemplo iisdem remediis depellendus.

Vigorem potestatis nervosae et mobilitatem restitunt causae collapsus remotae. Super hac re jam comprehensis hoc solum adjiciendum superest, omnes morbos, qui collapsum faciunt, prius curari, et materiam quam gignunt, vel unde oriuntur, e corpore expelli, omnesque ejus fontes, si fieri potest, exsiccare oportere.

Corpus firmant, et igitur nervis vigorem comparant, diaeta nutriens, qualis supra fuit comprehensa, medicamenta tonica, exercitatio, balneum frigidum, quae, si caute adhibe-

adhibeantur, ut supra monuimus, remedia potentissima sunt, ad quae potest decurri.

Quae tonicis reliquis praestant, ea sunt cortex Peruvianus et chalybs: Vel simul vel separatim, et aequè liberaliter, ac ventriculus aegroti ferre valet, dari possunt. Rubigo chalybis reliquis ex eo praeparatis anteponenda, et magis liberaliter, quam solet, sumi potest. Ad sex drachmas usque, singulis diebus, tuto datam fuisse accepi.

Tonica quaedam singularia, velut flores zinci, juvare possunt. Amicus meus ingeniosissimus Dr Joannes Evans, qui Salopiae medicinam facit, in epistola, quam ab eo nuper accepi, zincum, satis liberaliter datum, in epilepsiam plurimum posse refert. A decem florum granis incipit, et dosin, donec aliquot ejus effectus manifestos percipiat, adaugere pergit. Vir celebris Dr Home flores zinci, hac hyeme in Nosocomio Regio Edinenfi, ad grana quinquaginta septem usque, pro dosi dedit. Dosin autem
aeque

aeque largam in paralyfi dare, raro erit necessarium.

Amara et astringentia conjunctim dantur; sed non aeque, ac cortex Peruvianus, profunt. Astringentia autem praecipua sunt alumen et acidum vitriolicum. Effectus tonicorum haud dubie edunt; quantum vero fiduciae in paralyfi in iis sit collocandum, experientia nondum demonstravit.

Antispasmodica utilia esse possunt, cum subsultus convulsivi morbum comitantur. Utrum vero in ullo paralyfis exemplo narcotica necne adhiberi possint, non parum ambigo. Moschus haud dubie dari potest.

Quo vigor mobilitasque systemati nervoso restituantur, calorem, et totius corporis et partis laborantis potissimum, omni ratione sustentare conandum. Hoc optime praestat circuitum sanguinis quam maxime liberum efficere.

Equitare, vel tali rheda, qualem supra descripsimus, vehere, huic consilio optime accommodatur. Si neutrum horum ferre possit

possit aegrotus, quodlibet aliud gestationis genus, quod parum fatigationis comitatur, velut equuleum cubiculo accommodatum, vel quodlibet simile, adhibere potest.

Remedia ad actionem potestatis nervosae excitandam apta sunt stimulantia. In vim nervosam inertiam illam, quae adeo constanter in paralyfi invalescit, tollendo, protinus agant necesse est.

Cum stimulantia interne adhibentur, effectus suos in ventriculum edunt, qui inde per nervos in partes systematis universas diffunduntur. Hoc modo agunt sequentia, piper, zinziber, sinapi, cochlearia, raphanus rusticanus. His adjungi possunt alkali volatile et balsama. Haec omnia vim nervosam adaugent. Quo modo agant, nondum compertum.

Stimulantibus externe applicandis adnumerandus est calor. Quatenus sub forma ignis possit adhiberi ignoro. Caeterum, commoda, quae inde possunt oriri, parva, pericula multa esse videntur. Vim nervo-

sam semper debilitat diu admotus. Electricitas vero omni hujusmodi consilio respondet, et stimulans longe potentissimum est quod corpori humano applicari potest. In totum systema eodem tempore, vel in partem laborantem solam, pro lubitu adhibentis, aget. Vis succussuum vero limitibus admodum angustis circumscribitur. Si terrorem aegrotanti incutiant, sub initium admodum leves esse, et postea, prout occasio postulat, augeri debent. Scintillae e parte laborante extractae non aequae ac succussus profunt. Vir celeberrimus Joannes Robison, philosophiae naturalis in Academia Edinenfi Professor, ut electricitas succussuum parvulorum serie adhibeatur, et per membrum paralyticum dirigatur, hortatur. Hoc globulum partem digiti centesimam, aut circiter, a globulo phialae proprio figendo, filumque ferreum, si ita loqui liceat, illum inter et summam membri laborantis partem interponendo, fieri potest. Communicatione autem pedem inter et exterius phialae tegumentum, per alterum filum

lum ferreum facta, fluidum electricum non citius quantitate idonea colligetur, quam ex uno filo devehente in alterum, tunicamque phialae exteriorem transibit.

Utra vero ratione electricitatem adhibebis, vigorem et mobilitatem potestatis nervosae multum adauget, cor firmat, et circuitum igitur sanguinis celeriores reddit. Hoc clare exponit, cur partes paralyticae per electricitatem magis plenae et obesae efficiantur. Cum paralyfis a collapsu pendet, omnis forsitan fiducia nostra in electricitate collocanda.

In plerisque exemplis, haec remedia universa circuitum sanguinis in parte laborante non satis promovent. Igitur electricitatem sub forma scintillarum, frictionem, epispastica, et rubefacientia parti affectae applicare, eandemque exercitare, omnino necessarium est. Nihil hic notandum superest, nisi quod exercitatio, quam hoc in loco volumus, machina a Buzaglo Londinensi inventa, peragitur, quae adeo formatur, ut membrum aegri laborans vel quaelibet pars absque

absque reliquis possit exerceri. Structura autem hujus machinae omnes, praeter auctorem, adhuc latet.

Causis omnibus denique, quae ea, quae consiliis prioribus respondent, adhiberi prohibent, diligenter occurratur. Si huic consilio satisfacere velis, omnes causas, quae vires corpori convellunt, velut pravam cibi concoctionem, alvumque astrictam, curiose fugias. Hanc laxantibus, oleo ricini vel aloe, solutam teneas. Calorem corporis debitum id panno laneo involvendo, nihilque lineum proxime cutem gerendo, conserves. Omnes animi affectus concitatiores studiose vites. Laetitiam, contra, modicam gaudiumque quaeras.

F I N I S.

DISSERTATIO MEDICA
INAUGURALIS

DE

FRAMBOESIA.

PROOEMIUM.

MORBOS inter plurimos, quibus corpus humanum obnoxium, illa orbis terrarum in regione, quae Zona Torrida nominatur, hujusque in parte speciatim, quae India Occidentalis vocata, pauci, memorandi, aut medicorum cura, quam Framboesia, digniores sunt.— Propter et frequentiam, utpote quo fervorum nigrorum, his in partibus, pluri mi tam saepissime afflicti destructique sunt; propter et severitatem solitam, hicce morbus studia nostra in se convertere debet. Tamen nobis hae solae non

causae fuerunt de Framboesia scribendi, at porro, quia perpauci auctores eam tractavere; et ex medicorum nimia negligentia illis in locis, eam medicandi cura, vetulis nigris plerumque traditur, quae, ad medicamenta specifica in hunc plurimos alios inter morbos, pretensiones habent. Eheu! quam deplorandum est, tot victimas his specificis falsis cecidisse!

Ob eas causas inter caeteras, hoc de morbo in hac dissertatiuncula inaugurali differere decrevi.

DEFINITIO MORBI.

“ Lepra albida est, quae in exteriori-
“ bus fit cutis; et aliquamdiu quibus-
“ dam sine aliis est membris; nonnun-
“ quam vero in toto fit corpore, interdum
“ ut totius fit corporis color albus.—
“ Quae, in membris, si ex mala fit frigi-
“ da complexione, haec sunt signa; quum
“ membrum in quo est, album est co-

“lore, itidemque ejus pili; et si cutis
 “phlebotomo vel acu pungitur, sanguis
 “ab eo non egreditur, sed humiditas
 “alba*.”

HISTORIA.

Hic morbus Arabiae et Africae inter incolas ortus esse videtur; et illinc primum nigris occidentem versus, ad insulas Atlantico in Oceano sparsas transvectus fuit, quibus locis nunc pervulgatus est.

Plerumque exortus primus, papulis parvulis circa inguina, partes generationis, axillam aut vultum et prope saepe anum, annuntiatur. Primo, hae aciculae minimae haud capite grandiores, percipi possunt. Dies quatuor vix fuerunt praeterita, quum se supra cutem plane ostendant: inflammatione, quae semper antecedit, occulta, retis mucosi nigrum propter infecti colorem. Illo ab tem-

* Halliabbae Mag. Persic. lib. viii. cap. xvi.

pore, quo videri pustulae, usque ad maturationem, possunt, novem aut diebus undecim non amplius est; et tunc albo-rem inducit cuticula, frangitque distringit, ichori seu saniei humorem vice puris perpetuò effundens. Dein formam suam pustulae mutantque albescunt, ab imo fungus nascitur ruber fragulo similimus. Partes circa affectas capillae omnes simul cum cute albescere quoque coeperunt, morbusque nunc contagiosus esse fit. Quotidie papulae magnitudine augent. Quoniam, diversis in temperamentis ac habitibus multum variare, quo tempore ad summum incertum est perveniunt, saepe observatum est. Inter nigros qui minime viribus fracti, Framboesiam multo citius ad crisin seu altitudinem proventuram, quam inter quos infirmos esse, a priore cognoscendum fit. His nonnunquam equales frago sylvestri pustulae mense primo apparent: at, quibus, victis ex vegetabilibus aut aliter, robore infirmis et asthenicis, faciem lau-

claudabilem non prius inducunt, quam bimestrisve trimestris actus est. Notandi fortasse dignum sit; quod, quum pustulae sint majores, pauciores sunt, et e contra, minores quum plures.

Om nibus hoc sub morbo laborantibus, quos mihi visere contingit, quo tempore, sub J. L. Blizard et Ashton Warner insula in Antiguenfi, chirurgi artis medicae scientiae suae celeberrimi, studerem, semper manifestam corporisque virium diminutionem evenire, percepi. Fateor Hillarii industriosissimi testimonium meam contra opinionem hac de re obstare; et fortasse, tam, aetate et majoris, observatione extensioris hominis sententiam me fecisse audaciter oppugnare, nonnulli putent. Attamen, res, ut se habeant, aut mihi saltem, quam aliis appareant, narrare malo. Framboesiae servos nigros, rarius, donec deficere vires, et corpora sua tabescere coeperint, quae, expensis suis, magistri plerumque intelligunt, succumbere observavi. Si mensis

unius spatio, morbus, adhibendis haud remediis, permanferit, de dolore ejus in offibus aeger faepe queretur, ulcerosae fiunt papulae et tactui paulatim dolorifimae. Regimine commodo commodisque medicamentis maturate adhibitis, ejus terminatio celeris ac fausta erit. Exarescentes tumores scabies habent, quae decidunt. Hoc ex morbo neglecto, finis, ut supradiximus, variusque incertus; ulcera interdum phagedenica, quae nodos, exostoses, in offibus cariem, morbum quoque, qui, ab Hillario, nominatur Arabum lepra, nigrorum in lingua Cucaba, producuntur. Vere haec mala aegris supervenire, incauto ex regimine atque vetularum nutricium iniquo abusu, videre saepissime possumus.

Quandoque circa pedum partes inferioris et calces tumores duri ac dolorosi oriuntur, qui, Tubboes lingua Affrica vocantur; hi, propter cutis duritiem atque crassitudinem, lentius maturefcunt, sed, nonnunquam ejicientes serum aut pus

tenuissimum, remediis nequicquam applicatis, per affectorum vitam manent. Hic quoque Framboesiae magistrum, ut dictus est, memorare necesse fit; haec pustula major caeteris est, quae, aliquamdiu, postquam aliae evanescunt, permanet. Situs ejus varius, nunc inguinibus, nunc axillis et diversis in locis.

D I A G N O S I S.

Symptomatibus ex supra memoratis, medicis nihil timendum est, ne hoc de morbo deciperentur. Morbus, quo, qui nunquam hunc antequam aspexerunt, falli possunt, est syphilis. Sed ab pustularum visu primo totum in corpus, et praesertim circa generationis partes, syphiliticis ab ulceribus perfacile Framboesia dignocitur. Pustulae super penis glandem syphiliticae primum oriri solent: at circa inguina, axillas aut faciem papulae morbi hujus primum sese ostendunt; praeterea, illius tumores cum cute

prope aequales, hujus tamen cute mox enascentes se praebeant. Framboesiae pustulae, tam magnae quam tumores aut ulcera venerea, qui in inguinibus nascuntur, raro fiunt. Quod Framboesia, frigida aut temperata in regione, notandum sit quoque, vix sua sponte nota fuisset oriri; barbaris regionibus et calidis, incolaram perpauci, in vitae aliqua parte, evadunt. Praeterea, qui Framboesia semel infecti, iis nunquam morbus revertitur, ut saepenumero syphiliticis fiat. Quovis modo, ab ulcerum facie, albore circa pustulas et earum situ, capillis albis, aliisque hujuscemodi, dubitatio de morbo hoc aufertur. Impetiginis species est, quae, primo, maximam similitudinem huic habet, nigrorum lingua Crocowa, at, paucis diebus elapsis, facile ab hoc dignoscitur.

P R O G N O S I S.

Si Framboesiae toto ejus cursu, sanationis bene administrata sint remedia,

propitius semper eventus sequitur. Sed, si debilitantia, scil. purgantia, emetica et caetera sanguinis purificantia, ut vulgo nuncupantur, simul vegetabilibus cum victis, quibus aeger adhaerere iussus; denique si longum per tempus morbus permanferit, de terminatione caute declarare debemus. Ex mercurio male applicato ac intempestive, plurimi, ut videtur, morbifica repulerunt que pro tempore subigerunt; at morbus, vi majore, plerumque supervenit aegris. Ulcera etsi phagedenica, morbo progrediente, orientur, aliqua spes fit, curationem, quamvis remotissime, morbi hujus effici posse. Magnitudinis papularum aut tumorum minutione, morbi terminatio semper anteceditur. Neceffe, tamen, ut, hoc in morbo, auxilium medici quamprimum vocaturum fuerit, si amovendum periculum omne fit.

CAUSAE REMOTAE.

Hac in parte tractare de causis predisponentibus ac excitantibus volo. Quemque in morbum, qui generi humano invadit, in corporis habitu plerumque aptitudo peculiaris extitit. Hacce, aut infectio facilius accipitur, aut cujusque morbi semina citius nascuntur; ullius morbi medicis nominatur causa predisponens. Etsi, ut supra memoravimus, nigros Africanos vim morbi hujus effugere raro accidit, tamen sequentibus plane, predispositionem quocunque modo morbum hunc favere et inducere necesse esset, apparebit; nam, praeterea rem se ita habere ex in caeteris analogia inferre, quoque ex multorum conditione, infectionem suscipere, qui, quam alii minus aptati sunt, possimus. Quum, inter sexus utriusque servos nigros, Framboesia, Occidentali in India, maxime apparet, et albos inter incolas nunquam

aut saltem minime, habitum existere hinc praecaufantem, vix recusemus. Vinemiatore, quique agros colunt, etiam qui vegetabilia plurima comedunt, hos, magis, caeteris paribus, hoc morbo exerceri quam alii, saepe numero observavi. Contra domi, qui manent, suis serviunt magistris et de animalum carne comedunt, Framboesiae plerumque innocui vivunt. Illi coenosi, atque modo tali inquinantur, utique perspirationis pori obstructi sunt; His vero, balneariis aquis se quotidie proluunt, et generosius sese alunt, evacuatio morbifici miasmatis per cutem maxime promovetur, et eo robustiores se reddunt. Sed habitum hunc praedisponentem amplius posthac explicabo.

CAUSA EXCITANS.

Contagio modus, quo morbus hic, est, ab uno ad alterum, traditur. Ab infecti tumoribus humiditas, ut antea dictum, ichori vel fero similis, distillat, quae, cor-

poris parti laesae applicata, hac via, integro contrahitur. Tali in modo, musci saepe contagium, confidendo, adferunt. Cum affectis, quovis fere modo, ullum habere consortium periculosum est; et nonnunquam, in eadem cathedra, audi- vi, quae calefacta aegris, sedendo, ut pluri- mi morbum contraxissent.

Antequam causam tradere proximam progredimur, de causarum actione paulo remotarum plenius agendum. Quum contagionum obscurissima natura et actio est, cumque variis ex principiis variis auctores conati effectus earum deducere, a quibus nihil inventum certum adhuc fuisset, ea praeteream. Non est nobis hic tantas lites componere.

Partibus diversis rite perpenſis, nexu- que inter se, equibus corpora nostra con- stituuntur, simul externis cum rebus queis afficimur, actionem, hoc, ut in morbis aliis, miasmatis forte intelligere facilius poterimus.

Deus sapientissimus corpus humanum

ita finxit, ut externis cum rebus facile afficiatur; etiam has inter res effectusque suos certam et invariabilem connexionem constituit, per quam, potestatibus applicatis, functiones salutiferae aut, juxta naturam, progrediuntur; et ab systemate toto vel parte aliqua perturbata, modis externis seu internis, morbi inducuntur.

“ In omnibus vitae statibus homo et reliquae animantes a mortuis se,” Joan. Bruno ait, auctor haud quaquam mediocris, “ vel alia quavis inanimi materia, hac sola proprietate differunt; quod externis rebus et quibusdam sui propriis actionibus, sic adfici possunt, ut ipsis vivis propria, suae actiones, efficiantur.” * Iterum auctor idemque progreditur: “ Id facientes res externae fere omnes sunt, calor, victus, sanguis, hinc segregati humores, et aer.” †

Omnibus perclarum est, quod, salutis in statu, caloris quantitas certa corpori-

* Elem. Medicin. cap. ii. sect. x.

† Id. sect. xi.

bus nostris necessaria, ut solida aequae ac fluida functionibus propriis rite perficiant. Hic animalium calor, quamvis, salute valente, suppeditetur atque constanter sustentetur, obnoxius, morbo praevalente, aliisque ex rebus, nimis esse profusus. Sed, quoniam, perspiratio insensibilis simul ac aperta, quocunque modo, ab corporis calore et medio circumambiente, pendet, ad causarum augmentum et repetitionem augebitur. Perspiratio immodica, ut Cullenus celeberrimus dixit, efficiet maciemque debilitatem, etiam si plurimi alimenta praebentes victus quotidie capiantur. Fluidorum, majore solito ex sumptu, defectio, variis modis macritudinem efficere potest. Primum, quum aestus aut exercitatio sanguinem in vasis ita properant, ut, organis perspiratoriis, oleum et cibi partes alimentariae intempestive corpore efferuntur; quo, textura cellularia, solitis suppetiis carens, collabitur. Porro, quandoquidem, labore ac exercitatione systematis sangui-

feri actio valde promovetur, fit, ut sanguinis oleum non tantum minime feceritur sed, quod antequam deponitur, id, absorptum, et e corpore, separatis excretoriis omnino fortasse evectum est. Cum, maciei atque debilitatis his causis victus vilisque macilenti additur usus, hi diri effectus, usque certius ac citius, assequuntur. Si, sit alimentis, quae, nullum aut saltem oleum minimum, recipiantur, suppetiae pauxillae, damni ratione assidue affecti vel evacuatione et excretionem perpeffi, praebebuntur.

Quod attinet ad victum, totidem verbis Doctore Culleno observatum, quod vegetabilium partes herbaceae animalia non tam, femina quam pinquefaciunt, nec haec tam multum, quam caro caeteraque ejusdem generis, quae, majorem quantitatem olei habent. Hinc, ii, quos alunt vegetabilia, raro nitidam aut fuculentam corporis habitudinem ostendunt. Has observationes accommodati, Nigrorum Antiguensium, aut Indiae Oc-

cidentalis ubertim conditioni, invenire causam propiorem morbi de quo nunc agitur, forte possimus. Notandum quoque, Framboesiae rationes eadem, pro nostri notitia, circa Africae littora multum praevalere.

Notissimum iis, quibus saepe fuit, insularum occidentalium fervos nigros videre atque alloqui, illos permultum sudorem emittere, aequè ac perspirationis materiam; huic rei, algorem, qui tactu percipitur. Super eorum cutem, assignare, debemus. Insuper, victus, quum alimentaria fere qualitate destituitur, quotidianum sumptum reparare minime capax. Plerumque herbis et farinis vilioribus vescuntur, scil. phaseolis, solanis hujusque generis aliis. Rebus se ita habentibus, corpora plurimum redacta et debilitata non mirum est. Hinc, vasosorum exhalentium ora valde dilatata, paludum miasmata aliasque infectiones, quae corpori adhiberetur, absorbere naturâ habiliora sunt. In hanc sententiam

Doctor Mead memorat, pestis praevalentiam, India Orientali, ad incolarum debilitatem naturalem, referre posse: Sed sua verba libentissime citamus; “ A famine,” ait, “ is very often succeeded by a pestilence; and this calamity generally begins among the poorer sort of people, whose diet to be sure is the worst.

“ The city of Surat, in the East Indies, is seldom or never free from the plague; and yet it is observed, that the English, who trade there, are in no danger of being infected thereby. Now the chief of the natives in this place are Banians, who neither eat flesh nor drink wine, but live very poorly upon herbs, rice, water, &c. and most of the inhabitants do the like, except the foreigners; this poor fare, together with the heat of the climate, makes them so liable to malignant distempers; from the attacks of which

“ those who feed well are more safe and
“ secure.” *

Praeterea, nigros inter rusticos, sordes, ut antea dictum, tam multo valent, ut contagioni maximum auxilium praebeant. Nam, cum, pori minimi, qui semper e cutis superficie materiam tenuem exhalant, squalore obstricti sint, perspiratio reprimatur, et gluten acre poris generetur. Et vero, pustulas primas apparere his in locis, quibus squalor magis congeritur, frequenter vidimus. Ex supra dictis, Framboesiae, inferre

CAUSAM PROXIMAM

Debilitatem esse, possumus, quae inducta, aut perspiratione nimis profusa, victu vegetabili, qui nequit damnum supplere. Causarum remotarum nonnullas indicere, et proximam stabilire, quae, Framboesiam, simul cum contagi-

* Mead's account of poisons, essay v.

nis actione, gignere atque perducere in unum consentiunt, conati; nunc peragendam morbi ad symptomatum nonnullorum rationem pergamus.

RATIO SYMPTOMATUM.

Pustularum. De secretionem notitia nostra minime extenditur. Tantum, tamen, certum apparet, quod fluidorum circulantium magna illa in quantitate, principiorum et partium diversitas existit. Harum nonnullae, a natura, corpus adhiberi nutriendo et sustinendo, designantur; aliae, officiis suis functis, ut excrementitia, putentur, quae ore vasorum suorum ex corpore emittuntur: si, aut, intempestive, priores ejectae sint, aut posteriores in corpore retineantur, ab iisdem inducuntur morbi, et systematis pars ve totum affectum evadit. Quum, igitur virus Framboesianum, in corpus affici ab eo predispositum, quocunque

modo accipiat, in humorum circulationem statim subiit, ac diversis cum fluidis sese difundit. Vis universi systematis, ex corporis debilitate, ejus actionem vincendi non capax est, itaque de die in diem magis valet, et cachexia continuo augetur. Denique, naturae conatibus hanc contagionem expellere, partim secernitur atque perspiratoria in foramina propellitur: at, exitu negato, his in locis sudore aliisque secretionibus commista, acriorem evadere credibile est. Hinc pustulae, quae, pro rebus post memoratis magis aut minus copiosae, oriuntur. Ab his, si medicamenta et regimen commodum nunquam adhiberentur, phagedaenica ulcera, nodi exostoses et caeterae consequentiae dirae sequuntur.

Copiae aut paucitatis pustularum. Causam pustularum in variolis tradente a Doctore Culleno, memoratur, quod magis aut minus virulentae atque copiosae, uti-

que humorum corporis plus aut minus, morbillosa ab contagione suae naturae simuletur; et prout, materiam expellere, cutis aptior fit.* Anne contàgio Framboesiae specifica prope eodem in modo agit? Atque pustulae hujus nonne copiosiores, quo tempore virus repellitur inque corpore tenetur, necnon vice versa?

Continuationis. Quamdiu contagionem manere in corpore finimus, magis usque magis in die augebitur. Interim, corpus magis debilitatum fit, quo, viri actionem sustinere minus possit; hinc totius systematis remisso ex habitu, aequè ac humorum acore particulari, morbus saepe diu perstat. Si vis definita, dato tempore, effectum determinatum producat, ejusdem major vis quantitas, eodem tempore, effectum quoque majorem dabit: Atqui, quoniam virus Framboesiam, nisi prius debilitati obviam ire, semper priori novam vim addit, necessario se-

* Cullen's first lines, vol. ii. DXCVIII.

quentur, hunc morbum, non tantum, longum per tempus permanfurum, fed augerique inveterafcere.

Debilitatis. Symptomatis hujus rationis mentionem fecimus, quum, caufarum remotarum actionem illustraremus. Fortaffe hic notabile eft, quod modus curationis, qui, purgantia, aliaque anti-phlogiftica, defendi vix poteft, adhibet.

Crinium alboris affectus circa partes. Remiffis corporis folidis, ex puftulis humor aquofus, ut, hoc in ftatu, femper fit, ichori fimillimus ftillabit; uti tenuiffimus atque acerrimus, facile fuper cutem diffunditur ac huic adhaeret, partibus aquofis pedetentim exhalatis, craffiores in cutem atque crines ficcant et colorem album faciunt. Cum primum acrimonia minuitur, atque pus laudabile rite formatur, partium, quibus applicetur, colorem non diutius humor puftulae mutare poteft.

P O R P H Y L A X I S

Istae hoc in morbo praeveniendi rationis occurrunt, ut sanitas corpori conservetur:

1^{mo}. Debilitatis, roborante et salutifero victu potuque, causas, tollere:

2^{do}. Rationem, quoad corporis et vestium munditiam, habere:

3^{tio}. Ab accipienda infectione, ab iis morbo affectis, caute cavere.

Nostram curam, ad fervorum nigrorum salutem praecipue versi, in Occidentalis Indiae insulis, qui, diri hujus morbi vastationibus, praecipue subjecti sunt, Framboesiae occurrendae modos, qui aptissimi, proponamus. Imprimis, ut morbum occurrendi optima methodus, victum largum succique roborantis plenum prescribere volumus. Nobis opus fuit, fervorum cibaria esse plerumque vegetabilia, ante memorare, simul quibusdam cum crassis farinis: At, forte magistris,

ex eventu, animalium carnis quantitatem modicam ter aut quater de hebdomade singulis laborantibus tradere, conduceret. Sic et salute inque robore extarent, et dominis suis graviora pensa praestare valerent. Illis in insulis patet, quod, ea tempestate, cum cannae saccharatae in manibus sint, morbi non tantum iis defunt, sed quoque persucculenti evadunt. Itaque, si Domini, corpora et animos sustinere sic ciboque potu curarent, ipsis commodi esset, et morborum miseriae servis multum minuerentur.

Celebr. ab sanctorio jamdudum scriptum, aquam gravidam factam particulis extraneis, perspirationis canales parvas obstruere, et materiam ipsam ichoream reddere; hinc dispositio cachetica saepissime inducitur: Verum clarius quam ut nobis promulgandum, quod aquae, quibus, generis pessimi sunt, nigri saepe utuntur. E paludibus depromptae stagnantibus, vegetabilium putrium, atque

materiae mineralis aut fossilis, quantitatem maximam continent. Quandoquidem, alimenti nostri aqua vehiculum praecipuum est, ut pura sit, maxime nobis confert. Hippocrates, qui tractatum eximium hac de re scripsit, non tantum morbos, sed quoque temperamentum habitumque nationis diversae incolarum, diversis aquae qualitatibus, quae naturae iis suppedita, attribuit. An Domini igitur benefacerent, diversis in agrorum locis cisternas lapide percolante accommodatas, in fervorum usu, extruere?

Quo munditiae habitus inter hos servos, foeditati nimis propensos, instituerunt; modi, qui mihi aptissimi videntur, sunt, ut, eos, curatores fideles, alterno quoque die, ad umbram frigidam, opere peracto, ducerent, ibique, usque frigerent, detineantur; tum, quemque vestes exuere et sese lavare in balneis composito extractis, curent. Sic, brevi tempore, illis munditia optabilis fieret, et lavandi

fese officium ultro tandem continuaretur.

Jam, cum iis hoc sub morbo laborantibus, commercium, aut quovis modo consortium habere, periculosum esse; memoravimus. Discrimen a Framboesia, quod, tali modo, oriretur, quantum possibile fit, occursurum esse, Domini, pro receptione aegrorum, agro in remoto, valetudinarium extruere debent. Universos nigros, semel quaque hebdomade, peritus in conspectu suo incedere jubeat. Quamprimum morbi hujus ulla symptomata appareant, infecti in valetud. mittantur, ibique teneantur, donec convalescant. Discessus tempore, ne contagio suis fociis impertiretur, aegrotorum vestes omnes comburantur, aut saltem optime laventur. Priusquam mancipia ab negotiatoribus coementur, maxima cura adhibeatur, ne ipso tempore aegrotentur; namque mercatoriarum navium chirurgi, saepe, unguenta quaedam et lotiones, quae papulas depellunt et

cutem mollem reddunt, quo deciperent emptores, applicare solent. Domini de hoc caveant, quia, vi majore posthac erumpere, morbus tantum, pro tempore, celatur.

Has premonitiones observando, uti foedus hic morbus maxime mitescere potest, si non penitus occurri, putamus.

Quaeritur; necne Framboesia ex corpore morbofo in sanum inoculatione, ut in variolis, morbillis et nuper in pesti fit, commode transferretur?

METHODUS MEDENDI

Prima et fere sola hoc in morbo indicatio, quae nobis occurritur, ut recuperandae sanitatis finis absolvatur, est, vigorem pristinum corpori restaurare, ut contagionis vim facilius superaret. Remedia, quae huic consilio applicanda, cum morbi diuturnitate, variare necesse erit. Nam, cum in prophylaxi, quaque heb-

domade, nigros fervos coram custode sedulo recenseri, hac via, morbum prima periodo detegere poterimus. Medicamenta, cum res ita se habeant, mitiora, debent. Cum primum, hoc morbo affectum visere facultas medicis data est, balneum tepidum, aut nimirum frigidum, statim paretur, morbosus se ipsum perlotus, vestimenta pura se induat. Aeger habeat decoctum pinque ex carne confectum, et subinde carnis ipsius paulum capiatur: hora somni, gr. xx. pl. aut min. pro viribus vel aetate, pulv. dover, quoque capiantur. Sic, squalore amoto, et canalibus perspiratoriis deobstructis, systematis totius pars quaeque functiones suas peraget: humor lenis super corpus inducetur, quocum virus avolet. Victus nutrimentarii usque continuentur; atque, si unquam necesse sit, balneum callidum repetatur: vestes saepe mutantur, namque squalor plurimum curationi obstat, ac virus ipsum iterum ab cute corripitur. Cerevisiae primae, ni

plurimum sumptum faciat, quoque die, commodissime exhiberetur paulula quantitas.*

Si morbus, ex quadam negligentia, diu extiterit, antequam auxilium medicum advocatur; et, ex primarum viarum conditione, si opus fuerit, emeticum et catharticum acre, seu enema adhiberentur. Postea aegrotus, ut supra dictum, seipsum lavet, et regimen praedictum strictissime usurpet. Si posthaec, morbus remediis his haudquaquam cedit:—Recipe camphor. pulv. drachmam unam, antimon. crud. pulv. unam unciam, flor. sulphur. unam et semunciam, syr. com. misce fiat electuar. cujus capiat aeger q. n. mosch. min. m. et h. f. Alterna quaque nocte, vin. antimonial. gut. xl. quoque habeat, aut, ejus vice, pulv. dov. dos. repetatur. Lignorum a liquorum decoctum, communi pro potu, nonnunquam utile fuisset; horum,

* Bell's treatise on ulcers, p. 417.

guaiaci rasur. lig. sassafir. usitatissima sunt. Ut mercuriales preparationes per saepe, pejore in conditione infectur relinquant, ab earum usu dissuadere malumus: has morbum depellere quidem aliquando compertum fuit, sed, saepe numero, in ossibus dolor, aliique morbi contumacissimi inducuntur. Cum primum, pustulae pus laudabile effundere, ulcera escharoticis erodenda, atque ungt. quoddam digest. applicandum est.

Dr. Hillary, de quo antea mentionem fecimus, antimonialia simul cum Ethiope minerali multum laudat; his conjuncta decocta sarsaparillae et lig. guaiaci, plurimum, materiam morbidam, ait, expellere, et humorum acrimoniam corrigere, valent. Denique, ptyalissimum movere, mercurialia, sub morbi finem, adhibere suadet.

Modus, quem vetulae adhibent, adhuc parum notus est. Animi earum superstitione imbuti, morborum multorum curationem virtutibus caecis herbarum,

attribuunt. Ita magis de casu quam consilio, morbum in curando, successus earum constant. Tamen, concedendum, quod, Indiam per Occidentalem, pauci sunt empirici, qui, ex usu longo, hujus morbi violentiam avertere, didicere.

F I N I S.

DISSERTATIO MEDICA,
INAUGURALIS,
DE MORBI VENEREI NATURA,
ATQUE
DE FACULTATE PROPRIA
QUA IN HUNC
MORBUM POLLEAT
ARGENTUM VIVUM,
QUAEDAM PROPONENS.

DE Siphylide indaganti haec fere primum venit consideranda quaestio, anne sit novus morbus, an veteribus cognitus? De ea enim re multum disputare solent auctores medici. Adeo fusa autem disseruere, dum hanc exolverent quaestionem, ut quae ab illis proferantur argumenta, ea, usitata hujusmodi dissertationum brevitatis, strictim omnino perscrutasse vetet, immo ne summam quidem attingere sinat. Illam tamen fatendum est multo magis verisimilem mihi videri sententiam, quae siphylidis recentem originem sibi vendicat, atque hanc potius inter medicos valuisse credo, quorum plerisque persuasum est, hunc morbum ante seculi decimi quinti finem nullo modo extitisse *. Ad quod ^{causam} con-

* Vid. Astruc. Vol. I. Lib. I.

firmandum, alia quae memorari possit res, magnopere, ut opinor, confert. Si nationibus enim antiquis innotuisse putaretur Siphylis, ut Romae quoque apparuisset, quam per tot secula caput mundi permanisse, atque cui exteros ab omni orbis terrarum parte concurrere solitos fuisse, omnes noscimus, vix certe dubitandum est. Ista autem postquam sese ostendisset urbe, scriptorum Romanorum quin observationem sibi vendicasset, impossibile fere videtur. Poëtarum saltem attentionem meruisset tam dira atque contagiosa labes, Satyrae occasionem praebens, ut severitati ita licentiae aptissimam. Nulla tamen de Siphylide facta mentio est a scriptoribus Romanis, atque silentio eorum summi forsan momenti derivari possit argumentum, hunc morbum ignorasse prorsus nationes antiquas †.

SIGNORUM ENARRATIO.

Viri venerei in corpus humanum effectus in duo stadia diduci possint. Horum alterum a

† Neque Horatius ad mores hominum notandos ita praecipuus et vitia, ut poenas quae sequantur vitia; neque acrior atque licentior Persius, aut Juvenalis, aliquem attigerunt morbum in carminibus suis qui ulla cum probabilitate pro Venereo haberi potest.

simplici viri contactu cum aliqua corporis parte oriri solet, atque *Locale* vel *Primarium* nominabitur. Alterum magis commune est, atque a veneno in vasa sanguifera recepto, ac inde postea in varias corporis partes erumpente, originem ducit. Hoc stadium appellabitur *Secundarium*.

Stadium prius quoque variare videtur secundum corporis locum quâ applicetur contagium. Si locum secernentem et glandularem afficiat virus, suppuratio sine ulcere, fere solum concitatur, sub Gonorrhoeae nomine; si autem in locum neque glandularem neque secernentem agat eadem labes, et suppuratio, et ulcera superveniunt. Suadet brevitatis ut de Gonorrhoea tractare mitterem; liceat ergo procedam ad caeteras morbi partes.

DE ULCUSCULO VENEREO.

Viri itaque venerei nec secernentem nec glandularem locum insipientis, quaedam quasi puncta, velut scintilla ignis exusta *, alte rubentia, concitare, prior pene effectus est, quibus autem cito decedentibus, infra ostendunt sese ulcuscula, mali quidem habitus, sed quae non tamen facile est descripsisse verbis. Colis glandem in maribus,

* Vid. Andree, Obs. on Ven. Dis. p. 6,

plerumque occupant, atque praecutii superficiem internam; in foeminis autem praecipua sedes est, clitoris cum ejus praecutio, vulvaeque labia, velut partes quae sensu prae caeteris acuto polleant. Ad excitanda illa, quod tempus necessarium sit, diversum est in diversis aegris. Spatium intra horas xxx, et iv vel v dies, plerumque requiritur, etsi aliquando hoc tempore serius aut citius concitentur ulcuscula: uno quidem a Huntero memorato exemplo, quo etiam post menses duas, effectus suos edidisse dicitur venereum virus *.

Inflammatione vel majore vel minore haec semper comitantur ulcuscula. Quae autem ejusmodi prae se ostendit signa, inflammatio, originis venereae non verè esse dicentur, quod aequae ac a venereo pure eadem concitata videre est, ab ulla alia stimulante noxa: cujus autem generis praecipua sunt Phymosis et Paraphymosis; Vicinarum partium Phlegmon et Erysipelas; Gonorrhoea symptomatrica; atque Testium Tumor.

Quando colis super glandem cutis reduci non potest, Phymosis nominatur. Ulcuscula venerea hic comitans affectus, multum habet incommodi. Abscessibus inter praecutium atque glandem originem praebet, nec medicamenta adhiberi sinit. Praeterea si inflammatio vehemens fuerit, praecutii extremitates adhaerere cogendo, impedire urinae viam periclitetur †.

* Vid. Hunter. Treat. on Ven. Dis. p. 218.

† Ibid. p. 222.

Paraphymosis contra dicitur cum praeputium ita intumuit, ut super glandem induci nequeat. Altera periculofior, quippe cutis circa colis glandem constrictio, iter sanguinis impediendo, gangraenam minitet.

Inflammatiō Phlegmon et Erysipelas dicta, qua stipantur ulcuscula venerea, nil proprii habet, a vulgari phlegmone et Erysipelate, quadam alia causa, siphylide aliena, oriente.

Gonorrhæa symptomatrica, atque Testium tumor non accidunt, nisi morbi initio, et inflammationi vehementi †.

Ad ulcuscula venerea in Foeminis dignoscenda, descriptione nova nullum opus est. Numerosiora esse quam in viris solent, a superficie veneno exposita largiore; et inflammationis minus habere, a sensu habetiore quo pollent mulierum naturalia.

De vitiis quae ulcusculis superveniant.

Ulcusculis autem quaedam alia succedere asuerunt vitia.

1. Praeputii insueta crassities, a praecedente inflammatione.

2. Verrucae, quae secundum varias earum formas, variis donantur nominibus, sed quae omnes videntur esse ejusdem naturae.

3. Carcinoma. Hoc vitium periculosum post ulcusculum impletum aliquando supervenit.

4. Ulcuscula non venerei generis, sed quae

† Vid. Andrec. Ob. on Theor. and Cure of Ven. Dis. p. 6.

eodem loco infideant quo priora venerea.

5. Morbi venerei Stadium quod Commune, vel in toto habitu inesse dicitur. Stadium hoc ulcuscula multo saepius quam Gonorrhœam sequitur, ratione, Huntero teste, unius a Gonorrhœa, ad centum ab ulcusculis, infecti †.

DE BUBONE VENEREO.

Venereni siphylitici alter localis effectus est Bubo venereus. A pure venereo ab ulcusculis resorpto, inguina advecto, ibique sui generis inflammationem in glandulis conglobatis ciente, gignitur. Hinc summo corpore, ubicunque reperiantur hujusmodi glandulae, oriri possint bubones, sed pro evidenti causa, inguina potius infestare solent; atque idem fere occupare latus, quo penis latere, prius sita fuerint ulcuscula ipsa. Si penis utrumque latus erosum sit, tum intumuisse quoque utraque inguina periculum est. Bubonum praecipua sedes est in maribus glandularum inguinis superior ordo; in foeminis autem frequenter accidunt quo loco terminent ligamenta rotunda dicta, atque ad labiorum latera ‡. Aliquando, sed raro, sine ulcusculo praecedenti, superveniunt bubones.

† Vid. Hunt. Treat. on Ven. Dis. p. 288.

‡ Ibid. p. 260.

Atque hunc quoque affectum, quam ulcuscula frequentius, comitatur gravis phlegmon aut Erysipelas.

DE LUE SECUNDARIA.

His de Venerei morbi primario vel locali stadio memoratis, proximum est ut de illo dicam quod Secundarium vel commune nominatur. De ista autem appellatione, observare aliquid necessarium erit. Ab ea enim minime intelligendum est, hoc luis stadio, ac istis morbis, ita affici hominem, qui totis corporibus oriri, atque communes esse, rectè et proprie dicuntur. In iis namque, ut in febribus, pro comperto est, signa omnia, a quodam totius corporis pendere statu, nec ullam assignari posse morbi sedem. In lue autem secundaria nihil non contrarium sese habet. Nunquam enim hujus a totius corporis conditione excitantur signa, sed a vitio solo locali, atque huic una et certa sedes perpetuo assignari potest, *summum* scilicet *corpus*. In partes enim ita fitas, atque in illas solas, rabiem suam excercere valet venereum virus, etsi hoc morbi stadio in sanguifera vasa receptum fuerit, et per humores totos diffusum. Neque enim ab exemplis memoriae traditis, fide dignis, ostendi possit, malum hoc infestasse unquam, aut cerebrum, aut ventriculum, aut

intestina, aut ullum alium de corporis interioribus locis †. Quos autem effectus summo corpore excitare soleat hoc luis stadium, si auctororum recensione judicandum sit, hi pene innumera-biles reperiuntur *. Nullum enim modum sibi statuerunt medici in hujusmodi enumerandis malis; etsi forsan hos ita adscriptos luis morbos si paullo strictius consideremus, eorum plerique aut aliorum morborum propagines deprehenduntur, aut saltem illos vix ac né vix quidem observare possimus temporibus hodiernis. Eos igitur recensuisse sat erit, qui haud dubie a lue venerea originem trahant, atque a medicis enumerentur praesentis seculi. Praecipui sunt Oris atque Faucium ulcera. 2. Cutis maculae et variae Impetigines. 3. Dolores caeterique ossium affectus. 4. Tubercula atque carnis durities; quibus addantur, 5. Ophthalmia venerea, 6. Surditas venerea.

I. De oris atque Faucium ulceribus.

In omni circa guttur et fauces parte hujusmodi ulcera videre est, sed tonsillis, uva, et palato fere oriuntur. In narium cavitate quando accidunt, Ozaena Venerea nominatur morbus. Ab aliis ulceribus nulla verborum descriptione, sed frequenti solum inspectione dignoscenda sunt. Hac re tantum differre videantur ab ulceribus primariis, quod minore circundentur inflammatione.

† Vid. Hunt. Treat. on Ven. Dir. p. 305, 306.

* Vid. Luisin. aphrod. Astruc. de Morb. Ven. lib. iv.

II. De cutis maculis, aliaque Impetigine.

Quaecunque vitia corporis cutem male habuisse nota fuerint, ea inter venerei viri effectus ab auctoribus recensentur. Horum frequentissima quae vero accidunt, sunt coloris subrubri maculae, faciei atque frontis cutem praecipue occupantes, aliasque corporis partes aëri externo expostas. Hujus autem generis, quae primae apparuerint, cae vulgo evanescere solent, sed aliae succedunt, quibus invicem recedentibus, ita repetita res est, ut cute tandem erosa, infra relinquatur ulcus*. Manuum palmas, atque pedum plantas, si infertarent hujusmodi ulcera, Rhagades vulgo appellatur morbus, et insanabilis fere evadit†. Ex hisce quoque gignuntur maculis bullulae quaedam, sero repletae, quae alis et inter nates orientes, Herpem constituunt veneream‡. Scabies calvariam inter capillos foedans, Porriginem veneream, vel Tineam capitis facit. Ab cute labes venerea aliquando ad ungues serpit, quae erosae decidunt; nec capilli ipsi periculo vacant, sed subinde fluxisse dicuntur.

III. De doloribus caeterisque ossium affectibus.

Effectus in ossa non minus graves exercet Siphylis, quam in cutem. In omnia autem os-

* Vid. Hunt. Treat. on Ven. Dis. p. 320.

† Vid. Plenck. Andree, obs. on Ven. Dis. p. 138. Afl. vol. 1. lib. iv. c. 3.

‡ Vid. Hunt. Treat. on Ven. Dis. p. 320.

sa, non aquis pollet viribus. Illa fere sola infestare affluefcit, quae et exigua defendantur carne, et aëri externo magis obnoxia videantur. Hujus generis sunt, de Calvaria frontis praecipue, temporum atque parietum ossa; jugulum, sternum, scapulae summae, cubiti extremitas, tibiaeque pars anterior *. Oblongorum ossium medias et portiones solidas pene solum invadit.

Siphylidis in ossa inguentis signum fere primum est dolor magis vel minus intensus, saepius tamen intermittens. Hunc tandem sequitur quaedam ossis pinguedo quo loco prius affecerit dolor, atque qui ita oriuntur tumores, pro materie qua varie componuntur, variis donantur nominibus. Si mollia sint, Gummata nominantur, quae periostei vitia esse, adfirmat Astrucius; si dura, instar ossis ipsius, Nodi, Tophi, Exostoses. Oblongorum ossium extremitates tumore affectae, auctorum Hyperostofin faciunt. Vitiorum autem omnium quae ossibus incidunt longe perniciosissima est Caries, quae remediis neglectis his ferè omnibus succedere minitet. Quà tamen maxime infestat pestis haec, sunt palati tenuia et narium ossa, ubi sine tumore precedente invadere solet. Hic saevissimam suam excercet rabiem; atque parities inter

* Vid. Hunt. Treat. on Ven. Dis. p. 307, 308, 309. Swed. Pract. ob. on Ven. Dis. 105, 106. And, ob. on Ven. Dis. 103, 104.

os et nares destruendo, ut et ossa nasi planando, duas foedissimas morbi reliquias non raro post se relinquit. Siphylidis quoque prolem esse, Spinam Ventosam, quidem medici auctores sunt. Enumerantur etiam inter ejusdem effectus, ossium Mollities et Fragilitas *, terra ex qua constituuntur absorpta; utraque tamen rarissime, seculis hodiernis observare est.

IV. Tubercula, atque carnis durities.

Cutem autem inter calvariae capillos, collumque posterius, praecipue infestare solet hujusmodi durities. Callositas ferè sub cute duriuscula est, non oculo, sed chirurgi solum digito dignoscenda, nec quid doloris habet †. Tubercula naturalibus orientia, appellantur varie, velut Porri, Cristae, Condylomata; circa anum autem genita, aliis nuncupantur nominibus, Mora, Fici, Mariscae ‡. Haec tamen postrema, Siphylidi non recte ascribi debebunt, quod a causis, viro venero alienis, saepissime gignuntur.

V. De Ophthalmia Venerea.

Occulos quoque, ingruente viro venero, omnigenis vitiis patuisse a scriptoribus dictum est. Hoc autem longe frequentissimum est, quod adnatae tunicae, punctorumque lachrymalium ex inflammatione, atque lippitudine nascitur. Inflammatum etiam vicina cornea, ali-

* Vid. Swed. Praet. obs. on Ven. Dis. 237.

† Andree obs. on Ven. Dis. p. 130.

‡ Vid. Astruc. de Mor. Ven. lib. iii. cap. x.

quando suppurat. Crassa alias et maculata fit, cui rei interdum caligo succedit *. Si ad angulum internum pervadat morbus, Fistula producitur Lachrymalis. Hanc autem ossis unguis tenuissimi fere excipit caries, vel pernicies ista in ossibus vicinis ipsis concitari possit, atque inde ad oculum pervenire.

VI. De Surditate Venerea.

Aurium quam oculorum vitia, multo rarius a Siphylide veniunt. A Schwediaur unum quidem refertur exemplum, quâ Surditas provenisse dicitur, ab ulcere palato molli insidente, atque, partium consensu, tubam Eustachianam commovente †. Non tamen defuerunt auctores, qui in meatu auditorio tumores duros excitantem, atque auris quatuor officula quidem ipsa, nodis, tophis, et exostosis exasperantem, secundariam luem describere ‡.

Haec supra memorata signa, excepta Gonorrhoea, atque illam quae sequantur vitiis, mihi omnia visa sunt quae rectè et vere ascribi debent venereo viro. Huic autem opinioni fatendum est minime consensisse multos et summae auctoritatis viros, qui haec et multo numerosiora esse putarint, et, velut Siphylidis certissimam prolem, recitarint. Sic Astrucius glandula-

*Vid. Andree obs. on Ven. Dis. 126, 137. Swed. Pract. obs. on Ven. Dis. 158, 224.

† Vid. Swed. obs. on Ven. Dis. 226.

‡ Vid. Astruc. de Morb. Ven. vol. 1. p. 423.

rum conglobotarum totius corporis vitia a lue secundaria deducit, quas hac causa adfirmat inflammatione et tumore affici *. Hujusmodi autem glandulas nec tumuisse, nisi applicato primarii ulceris pure; nec secundaria ulcera bubones excipisse solere, docuit nuperior et adcuratior observatio. Naturalium quoque ulcera a lue secundaria oriri, idem acutor est. Sed illa nisi primariae lue supervenire, hodie saltem nunquam deprehendimus. Neque hic tamen consistere solent medici hujusce morbi effectus graves multiplicando. Velut carminis conditor epicuri, qui heros suum quam maxime exornatum voluit, atque in omnibus excellere rebus, sic morborum quicquid, in ulla orbis terrarum parte, sub ullo coelo, humanum genus cruciasset notum sit, id huic medici attribuire veneno. Ita de vetustioribus quidam, omnium generum febres, morbum comitiales, podagram, morbum articulare, atque malorum aliorum mille, ob illo derivant. Astrucius quidem ipse, facultates corporis omnes a Siphylide corruptas esse tradidit, animales, naturales, vitales †. Quia autem in hujusmodi enumeratione longe alius antecessit, est Plenckius. Jactata et inventa nuper nosologia nixus, prolifica ista, et divisionis absurdae, et sine ^{ne} fine variantis origine, cui apprime ac-

* Vid. Astruc. de Morb. Ven. vol. 1. lib. iv. c. iii. S. 6.

† Vid. Astruc. v. 1. lib. iv. c. 9.

commodatum videtur, ingenium, venerici viri effectus, in haud minus quam duas et viginti classes, atque genera C^{VI} distribuisse ausus est. Horum autem plurimos morborum hac causa deducere, plane inepti adparet. Enumerantur enim inter classes, Febres Venereae, Spasmi, Adynamiac, Profluvia, Emaciationes; inter genera autem, Febris Exanthematica, Inflammatoria, Intermittens, Tetanus, Hemiplegia, Colica, Tussis, Tenesmus, Phthisis Pulmonalis. Supra necnon observatum fuit, Siphylidem per omnia sua stadia semper morbum localem esse, nec cum iis qui totis corporibus inesse dicuntur, ullam habere adfinitatem. Qui autem nunc recitantur morbi, communes fere omnes sunt, non locales. Neque reddi possit causa, cur magis, vel minus hujusmodi morbis obnoxii essent Siphylide laborantes, quam alii, nisi hoc forte crederetur, illos in hos morbos incidisse solitos, a debilitatrici curatione ista, quam Siphylidi adhibere consueverunt, medicinam olim facientes.

DE SIGNORUM RATIONIBUS,

ATQUE DE

INFLAMMATIONIS VENEREAE NATURE.

A tempore quo per Europam grassari incepit venerea labes, opiniones et multas et varias, de signis ejus atque natura, protulerunt medici. Hae autem sibi proprias formas assumpsisse dicantur a disciplinis istis quae tum forte in scholis valebant, ac velut ipsa quibus stabilirentur principia, jam summa cum fide receptas videre est, postea autem, labentibus annis, explosas. Et si alias dissidentes tamen, hac una in re sat firmiter consentiunt. Hujus enim morbi causam, in aliqua humorum corporis pravitate, a venereo inducta viro, semper collocari, atque huic solo suborto vitio omnia ejus symptomata semper ascribi debere, inter omnes fere auctores convenit. Quae quidem opinio longe lateque pervasit, atque ad nostra fere usque permansit tempora. Praesentis namque sub initium saeculi, quando Pathologiae quae Humoralis dicitur instituta, tam ornate exposuit Boërhavius, hanc quoque opinionem, ut auctoritate confirmavit, sic facundia sua illustravit, egregius auctor. Quo enim libello de Siphylide scrip-

fit, illa sola utitur ad signa explicanda omnia *. Neque qui ei successerunt medici, ab ejus discesserunt rationibus. Similem prorsus omnes explicationem secuti sunt, prae caeteris autem Astruccius, vir fusus atque indefatigatus, quem praeceptoris sui gradibus insistentem, atque per volumina magna haerentem, etsi passibus haud aquis, nunquam non observare possumus. Ea autem jam demum explosa est sententia, quae morbos omnes in fluidorum corporis vitiis collocare solebat, atque ei majore cum verisimilitudine successit altera, quae illos potius derivare statuit ab affectibus solidorum. Recentiores itaque hujus morbi causam, non, ut olim, ex ulla fluidorum pravitate, sed ex solo veneri viri effectu super aliqua solidorum parte, ibique concitata inflammatione, exquirunt. De hujusmodi autem inflammatione loquentes, novo quodam modo rationari solent. Negant enim veneream quicquid cum ullo alio inflammationis genere commune ostendere; immo omnia sibi propria habere; atque causa, signis, et curatione sua, ab illa vulgo corpus infidente, prorsus alienam esse, contendunt. Atque hinc itaque opinionis hujus primus et praecipuus auctor, Hunterus egregius, de cujus scriptis, quam priora conjuncta universa, ea plus novi atque utilis, de hoc morbo in medium protulisse, omni procul adulatione, dicere oportebit; Inflammationem Veneream velut *sui generis* nominare,

* Vid. Boërh. pref. ad Luis Aphrod.

atque ab omni alia *Specificae Inflammationis* nomine distinguere, semper affuetus est *. Hoc tamen loco fatendum erit, dum veneri morbi considerarem signa, sententiam istam non satis firmatam esse mihi visam. Etsi enim a tanti nominis auctoritate dissentire, magnopere timebam, nulla tamen deprehendere possem argumenta quibus ea evicta apparebat, vel quominus mihi persuasum esset, Inflammationem Veneream ab vulgari illa, quocunque corpori admoto stimulo oriri solita, ullius momento re, vel ad signa, vel ad curationem differre. Atque quoniam quidem huic Almae Academiae semper mos fuit, nullam credendi servitutem suis alumnis imponere, nec quicquid differendi copiam, modo id cum verecundia juventuti qua, par est propositum fuerit, renuere; hanc Inflammationis Venereae de natura sententiam, neque in medium proferre verebor, neque pro virili defendere. Atque similis quoque magis impetranda venia est, quando illic pervenissem, qua hoc mihi difficilius adgrediendum est, qua speciali vi in eandem inflammationem polleat Argentum Vivum, atque illi prae caeteris medicamentis medelae sit, exponere. Nunc autem ad propositum prius redeam, ut ostendere coner, nulla momenti re differe veneream ab inflammatione vulgari: atque quo hoc facilius demonstrari possit, hujus comparisonem instituere opus erit cum illa quae vulgaris dicitur.

* Vid. Hunt. Treat. on Ven. Dis. p. 1. chap. 1.

De hac vero posteriore, haec quaedam prius proposuisse liceat.

Inflammationis ideo de qua hic agitur, assignari possit causa, fluidorum ad partem solito concursus major, a stimulo admoto oriens. Hinc fit ut in vascula tantum serum vehentia propelleretur sanguis merus, atque his nova fluidorum mole distentis, superveniant dolor, tumor, atque rubor. Hujusce secundum stimuli magnitudinem, stadia varia percurrere solet Inflammatio. Si stimulus levis fuerit, veluti leni inflicta plaga, tum sanguinis, quae coagulabilis dicitur, in cellulositatem vicinam erumpit lymphæ, atque cellulas adglutinando et se et inflammationem sistit, donec, cessante stimulo, pars cito ad sanitatem perducatur. Quod itaque Inflammationis genus a Huntero *Adhaesiva* nominatur *. At si vehementior fuerit stimulus, velut contusio gravis, tum succedunt alia. Fluidorum concursus fit major, copia sanguinis nimia ita vascula distenduntur, ut in debilitatem magnam et laxitatem incidant: quo pacto evenit ut lymphatica vascula penes quae facultatem esse, quicquid corporis vita sua quoddammodo orbatum fuerit, reorbendi, jam compertum est, suum munus excerceant, atque partibus debilitatis exes, concitetur tandem *Exulceratio*. Si vehementius etiam parti incubuerit noxa, tum prorsus robur suum a-

* Vid. Hunt. Treat. on Ven. Dis. Int.

mittunt vascula inflammata, et *Gangraena* nascitur. Comitatur autem exulceratio^{nem} altera res, vel ei fere succedit. Supra ulcus effunditur pus, fluidum novum, atque a caeteris corporis alienum, utpote quod ab inflammatis partibus aegrae vasculis secerni videatur. Si constituitur *Suppuratio*.

Hisc de Inflammatione Vulgari propositis, occurrit iterum quaestio, quomodo de illa differat Inflammatio Venerea? De illa autem hanc non omnino variare, a rationibus quae sequuntur sat facile apparebit.

1. Inflammationis Vulgaris omnigenae semper causam esse stimulum quendam, jam supra memoratum est, quod de Inflammatione quoque Venerea simili modo affirmari possit. Semper enim a puris soli venerei contactu oritur posterior, atque hoc stimulum esse, immo generis sat validi, negatur nemini. Eodem prorsus modo, quo stimuli alii, quibus admoveatur partes perpetuo afficit. Tumorem atque ruborem simplicem primo concitat, deinde suppurationem exulcerationemque, et caetera inflammationis stadia. Hunc percurrere cursum, si sibi relinquatur morbus, ulcusculum et bubonem, ut veneream inflammationem omnigenam, nunquam non videre est.

2. Effectu suo variat Inflammatio Vulgaris, secundum corporis partium quas occupet naturam. In loco non secernente et aëri exposito oriens, suppurationem ut et exulcerati-

onem excitat; in fecernentē autem loco et glandulari, suppurationem fere solam, et exulcerationis expertem, gignit. Nec in Inflammatione Venerea res aliter sese habet. Loco enim non fecernenti, et aëri expósito, si pus adhaereat, exulceratio oritur, ut et suppuratio, et *Ulcusculum* constituitur Veneream; quoties in fecernentem autem atque glandularem locum eadem agat labes, suppuratio sola sequitur, ac formatur *Gonorrhoea*.

3. Variat quoque genere Inflammatio Vulgaris, secundum corporis vel partis habitum. Hinc in phlegmonem et Erysipelas diducitur. Nec deficiunt exempla ubi Inflammatio Vulgaris tandem in cancrum desinit. Hisce vero rebus non differt Inflammatio Venerea. Erysipelas interdum, phlegmonem saepissime, concitat, aliquando etiam in Cancro terminasse nota. De quibus autem casibus, hoc loco observandum erit, minus accurate loqui solere auctores medicos. Enarrare enim mos eorum est, Inflammationem Veneream, de phlegmone aut erysipellate, *comitante*, velut illi hac sint res extraneae: ideoque Argentum praeter vivum, auxiliis vel roborantibus vel debilitantibus aliquando opus esse, praecipiunt, ad haec nova occurrentia mala. Ita tamen oriens seu phlegmon seu Erysipelas, veneri viri, atque inde pendentis inflammationis aequae certa proles, procul dubio habendus est, ac bubo aut ulcusculum ipsum.

4. Inflammationem Vulgarem cur potius co-

mitaret phlegmon aut Erysipelas, a partis debilitate aut robore pendere videtur. Inflammationem Veneream eadem stipantia signa, similem causam agnoscunt. Ulcuscula enim aut bubonem cingenti phlegmoni, vel incisa vena, vel ex parte laborante, sanguinis missio adhibenda est: dum contra, Erysipelate urgente, opium, aliaque stimulantia, Huntero teste, optima sunt remedia. Eorum quoque qui Gonorrhoea laborabant, ubi ingravescere magis solet inflammatio, propter superficiem latiore, quam in aliis venereis affectibus, venereo viro expostam, hos fere solos exercuisse Erysipelas, quorum corpora imbecilla erant, quoque comperit habuit idem scriptor egregius. Nec non in pravi habitus hominibus, velut scorbuto afflictis, refert Andree, quam in firma valetudine utentibus, latius serpere, sese observasse ulcuscula †.

His rite perpensis rebus, patebit id quod supra affirmavi, nulla momenti re, a Vulgari differre Inflammationem Veneream: in una tamen variare fatendum est, fat quidem memorabili, sed quae ad signa ejus aut curationem, nil conferre videtur. Facultate pollet enim, semper pus generandi sui simile, quod vice sua pus aliud gignendi sine fine compos evadit, iisdemque prorsus praeditum dotibus. Ilanc autem venerei viri non tam universam quam olim credi-

tum facultatem esse, comperit jamdudum Hunterus. Ab experimentis ejus firmissimè evictum est, primarii puris venerei propriam dotem esse, nec omnino ad secundarium pertinere. Invenit enim egregius vir, nunquam valuisse ad contagium communicandum pus ulceri secundo ademptum.

Proximum est ut Siphylidis signa paullo subtilius explicare aggrediar, ad quod efficiendum, si vera sint, quae supra memorantur, facilius nunc forsan patebit aditus.

I. De Ulcusculo.

Glans atque praeputii superficies interior, quam aliae colis partes, ulcusculis potius infestantur, quod sensu acutiore polleant, atque ita venerei viri stimulo obnoxiores extent.

Quae excipiant ulcuscula mala, non explicatu difficilliora sunt. Phymosis et Paraphymosis nil proprii habent a venereo viro orti. Haec non raro accidit a summa colis cute per coitum retracta nimium et lacerata; illa a naturali sorde sub cutem eandem collecta, putrescente, et inflammationem ciente, frequentissime gignitur.—Quae sequuntur ulcuscula alia, 1. Cutis nempe Crassities insueta, 2. Verrucae, 3. Ulcera quibus superveniat Cancer, Inflammationis sui generis argumenta praebebunt nulla, quoniam omnia ab Inflammatione vulgari concitata per saepe observare est. 4. Quod ad Ulcusculi ultimam sequelam attinet, ulcera scilicet, natura sua, non venerca, sed loca prorsus

eadem infestantia, ab ulcusculis venereis occupata olim, id proprio Siphylidis contagio minime ascribi debebit. Ea enim lex de corpore humano institui videtur, ut partes quocunque modo destructae, dein inflammationis ope renovatae, tandem caeteris debiliores multo evaderent. Vitium autem de quo hic agitur, partibus nunquam nisi illis supervenit, quae multis ante ulcusculis venereis confectae, vix assuetas recuperassent vires; hinc enim accidit, ut aut corporis totius, aut partis prius affectae suborta quadam imbecillitate nova, vim supra memoratam, qua in loca tam debilitata, et principio vitali quoddammodo orbata, pollent, ita excerceant resorbentia vascula, ut aut nova moveantur ulcera, aut vetera renoveantur. Cujus rei exempla multa in morbis habemus. In Scorbuto, jam pridem fractorum ossium resolvitur et resorbetur callus, ut et vetustissimorum cicatrices ulcerum, quae etsi olim omnino ad sanitatem perducta, iterum serpere incipiunt.

Ulcusculo quam Gonorrhoeae frequentius succedere solet Secundaria Lues, propterea quod pars corporis exulcerata, absorptioni omnigenae semper magis accommodata est, quam solum suppurans.

II. De Bubone Venereo, praeter jam dicta, explicatione nova nullum fere opus erit. Ad inguina advehitur venereum virus, ibique agens, velut aliquis aequa potestate stimulus, dolorem primo, deinde tumorem atque ruborem

concitatur, postremo autem suppurationem exulcerationemque. Phlegmonis saepissime, Erysipelatis interdum induit sibi formam inflammationis, aliquando etiam in cancro desinit. Illud autem sat quidem mirabile videtur, quod venenum siphyliticum, etsi in corpus intimum receptum, atque per glandulas conglobatas plurimas, interiore corporis loca occupantes, cursu suo diffusum fuerit, nullam tamen inflammationem nisi istis glandulis concitaret, quae summo inveniuntur corpore. De qua re, vix sane explicanda, hoc tamen conjecturare licet. Nonne proprietate admodum simili polleat Inflammatio Vulgaris? Extraneo quodam in corpus intimum per vulnus vel aliàs recepto, suppuratio saepe nulla fit, cujus rei multa memorantur exempla. Sic acus et glandes plumbeas per plures annos in corpore interiore sine offensione mansisse, nullamque ibi suppurationem excitasse, deprehensum est, donec paullatim ad loca subter cutem perductae, ibique et suppurationem et exulcerationem moventes, postremo tandem do corpore ejicerentur.

III. De Lue Secundaria.

Contagium Venereum corpus ubi penitus pervaserit, multas suas vires amittere solet, seu cum humoribus corporis intime mixtum, magno opere diluatur, seu quacunque alia causa, incertum est. Hoc autem statu secundo quas olim invadere assuevit partes, nunc non omnino infestat. De quo genere sunt conglobatae

glandulae, quibus etsi summo sitis corpore, ditionem excercet nullam; ubivis enim corpore, oriente secundario ulcere, hae non amplius intumescunt; quam rem in ulcusculis istis videre est quae tam saepe et palatum et tonsillas foedant, quae tamen excipere nusquam animadvertuntur bubones colli *. Sed hujus viri post corpus ingressum imminuta vis, à Hunteri eximii experimentis, dilucidius etiam demonstrata. Pus enim de secundario ulcere ademptum communi ulceri, sed sine contagio, imponebatur. Pus idem, recenti vulnere immissum, innocuum prorsus evasit: † quae experimenta, eodem prorsus eventu, sat frequens repetebantur. Nonne haec venerei viri, postquam corpus intraverit, mansuetudo, quoddammodo causa fit, cur inter humores sine offensione latitaret, et tot menses tam frequenter elapsae sint, ante signa aperta quam Luis Secundariae ediderit?

Minime tamen existimandum est, hoc statu ^mittere prorsus potestates suas venereum virus. Vim suam validissime stimulantem nunquam non reservat. Hinc itaque de partium genere quod infestare solet, *eas quae sensu acutiore, semper primas afficit; deinde quae habetiore polleant.* Os, palatum, tonsillae, cutis invaduntur prius; post haec periosteum atque Ossa ‡. Neque haec, testante Huntero, usquam fere perturbatur series.

* Vid. Hunt. Treat. on Ven. Dis. part 6. chap. 2.

† Ibid.

‡ Vid. Hunt. Treat. on Ven. Dis. p. vi. ch. 1. Jut. 7.

Luis autem Secundariae quae oriantur signa, nulla propriae inflammationis praebebunt indicia. Eundem semper humorum concursum parti spectare est, ut et effectus ejus, donec tandem suppuratione, exulcerationeque terminetur vitium. Herpes quoque Venerea, Tineaque capitis, cum unguium atque capillorum pernicio, a quavis alia materia stimulante, cutem et male habente, aequae ac a venereo viro, ortum suum traxisse, saepenumero observantur. Neque Siphylide vitiata ossa aliquid novi afferre solent. Ea omnibus inflammationis stadiis pariter obnoxia esse, ac caeterae corporis partes, chirurgis universis notum. Quae ossium autem a venereo viro oriantur mala, vellet Nodi, Tophi, et Extostoses, cum Suppuratione, exulceratione, carieque, ea a vitiis iisdem, vel injuria externa adlata, vel quacunque alia concitatis causa, et contagio prorsus aliena, diversum nihil exhibere queant.

Haec autem sufficere videantur ad praecipua Siphylidis explicanda signa. Si vera sint, humorum parti concursus nimium, a stimulo venerei viri ortum, hujus morbi esse *Causam Proximam*, adjecisse fere supervacuum erit.

I. De Venerea tamen, ut inflammatione omni-gena, loco contenta, haec non levis momenti, haud praetermittenda est observatio. Praeter vulgo accidentem inflammationem, in robore nimio vasorum positam, et remediis debilitantibus occurrendam, aliud quoque reperiri ge-

nus, omnino hisce rebus contrarium. Haec enim et ex aucta vasorum debilitate nascitur, et medicamentis roborantibus tollitur. Illam, distinctionis causa *Sthenicam* nominare liceat; hanc autem *Asthenicam*, cujus non raro exempla habemus, et in ulceribus quae occupaverint vetustas longa, in illis pravi habitus hominibus orientibus, et ab injuriis gravibus parti adlatis, gangraenamque spectantibus; vel in quibuscunque aliis casibus, ubi, seu a stimuli gravioris violentia, seu levioris longinquitate, seu partis aut corporis totius infirmitate, atque ad stimulum sustentandum invalidi, in magnam inciderint debilitatem loci cujusdam inflamata vascula: haec enim omnia eodem revertuntur, et idem prorsus constituitur status. Ad illud vero posterius genus, fere semper pertinere videtur Inflammatio Venerea. In Primario enim hujus morbi stadio, ita violenter agit venerei puris stimulus, ut vehementia sua confecta partis laborantis vascula, cito in debilitatem caderent; dum in stadio secundario, ejusdem veneni etsi imbecillior facta vis, eundem tamen effectum praestat, actionis suae longinquitate, mansuetudinem novam quoddammodo pensante. Atque hinc itaque *Asthenici* generis, forsitan nunquam non habenda est, Inflammatio Venerea.

DE SYPHILIDIS CURATIONE,

ATQUE DE

FACULTATE PROPRIA,

QUA IN HUNC

MORBUM POLLEAT.

ARGENTUM VIVUM.

PER Europam grassante primum Venereo morbo, ut signorum novitate, ita dira quam edidit strage, adeo territos fuisse medicos, ut eo laborantes visere recusarent, memoriae traditur. Paullatim autem, postquam a terrore recuperassent animos, iisdem remediis tandem cum eo configere caeptum esse, quibus aliis occurrere solerent morbis, vel ista medendi methodo, quae tunc temporis Rationalis vocabatur. Hac autem cito spem suam fallente medendi via; quid agerent incerti, haesisse iterum dicuntur, velut qui de aegris suis pene prorsus desperarent *. A quibusdam vero reputatum esse, tandem novi quadam morbi similitudine perductis, cum aliis cutis vitiis, ut auxilium peterent ab argento vivo, quod in Lepra et E-

† Vid. Astruc. de Morb. Ven. L. 2. c. 6.

lephantia, caeterisque similibus summi corporis morbis, inter Arabes profuisse plurimum, jampridem comperiebatur. Neque quicquid ab illo expectarent, id fefellit medicamentum novum; ita enim praeter spem omnem feliciter subvenit, ut plures ope ejus cito ad sanitatem perductos fuisse accepimus. Quod mirum tamen videatur, hujus ita prosperè adhibiti remedi, non per multos annos valuisse administrationem, ex scriptorum testimonio discitur. Minus experti enim fuisse commemorantur hujus saeculi medicinam facientes in vehementis adeo medicamenti viribus, ita ut illud multo largius quam sat erat, administrare solerent: qua in re autem praecipue peccasse Emperici feruntur, qui tum ad Siphylidem sanandam per Europam frequentissimi vagarentur, atque imperitia quorum adeo gravia, et aegrotantibus quidem funesta mala oriri observabantur, ut in desuetudinem repentinam deciderit hoc optimum remedium, neque per aliquot annos postea in medicinae usum revocatum fuerit *. Eo enim expulso, quaedam nova in ejus locum successerunt medicamenta, quae in regionibus istis summam ferebantur attulisse opem, quibus morbus ipse credebatur ortus. Horum praecipua erant Guaiacum † et Sarsaparilla, quorum in curan-

* Vid. Astruc. de Morb. Ven. L. 2. c. 7.

† Qui primus medicamentum hoc in medicinam duxisse fertur Hispanus fuit, Gonsalvus Ferrandus. Is dum Neapolis in obsidione militaret, siphylide correptus, atque frus-

da Siphylide ita increvit fama, ut per longum tempus his fere solis uterentur medici. Post quae autem (namque non diu favorem retinebant, sed vice sua, antiquata, aliis cefferunt) multa alia quoque decursu, qui inter hoc atque saeculum praefens interjacerint annorum, remedia, in eundem finem adhibita videre est; quorum tamen quae unquam vere profuisse adparent, ea sub his forsan comprehendi possint generibus; *Argenti* scilicet *Vivi*, atque *Plantarum* de *Acrium* et *Aromatorum* specie: quibus praeterea addere licet *Stibium* *Opiumque*.

DE ARGENTO VIVO.

Horum autem longe praecipuum est Argentum vivum. Hujus enim in depellenda Siphylide efficaciam, medicorum omnium, per trecentos ferè annos experientia, sat lucide demonstravit. Etsi autem inter omnes de utilitate convenit, de propria sua virtute non eadem est concordia. Quae enim facultate et in corpus agat, id magnopere disputatum est; magis autem, qua speciali vi, in siphylitica ita prae-

tra in Italia curationem petitus, tandem in Occidentalem Indiam demigrare instituit, ut ista experiretur remedia quibus Indi ipsi sanabant morbum. Exhinc, postquam ibi pristinam recuperasset salutem in Europam reversus, exercuit ipse medicinam; atque novi medicamenti vendendo pro septem scutatis aureis singulas libras, brevi tempore, ingentes dicitur comparasse opes.

Vid. Freind. Hist. Med. p. 577.

caeteris medicamentis polleat mala: de quibus itaque rebus diversas et multas opiniones ediderunt medici. Has autem opiniones enumerasse, nec hic locus est, nec si locus esset, operae pretium foret. Illis enim fere communia esse ea dicantur, quae de rationibus supra memoratis dicta fuerunt, iis nempe quibus freti auctores, ipsius morbi naturam exponere molirentur. Istarum namque rationum instar, opiniones illas, jam summa cum auctoritate in medium prolatas, jam explosas penitus, decursu annorum, videre est. Quibus autem, ut pro vero et stabilito fuit, siphylitica omnia in quodam corporis humorum vitio semper collocari mala: sic illis, Argenti Vivi salutiferos effectus universos, nulli alii nisi actioni cuidam in eadem exercitatae fluida ascribi potuisse, aequè certum ac compertum reputatum est. Ineunte demum praesenti saeculo quando Pathologiae Humoralis disciplinas, quatenus hunc morbum attineant, exulta adeo oratione explicavit Boërhaavius, hanc quoque minime neglexit opinionem. Ab effectibus enim super humores corporis solis, totas Argenti Vivi deducit vires, quas autem in gravitate propria et acrimonia posuit: hisce enim qualitatibus ad eosdem humores et attenuandos et dissolvendos ita valere contendit metallum hoc, ut hi de corpore facile excreerentur, et unà secum detraherent venereum virus. Sed potius erit audire ipsum praecipientem. “Cunctis rite perpenſis, ad-

“ paret vera vis, qua ad expugnandum hoc ma-
 “ lum solus efficax Mercurius habetur: omnes
 “ humores corporis in subtilitatem aquae con-
 “ vertit, olei tenacitatem dividit, facit hinc ut
 “ evadant omnes adeo dissoluti, ut specie salivae,
 “ feri diarrhoici, urinae citae, vel sudoris, sponte
 “ de corpore eliminentur.” Quia idem auctor
 existimavit, a venereo viro facile corrumpi
 posse omnes corporis humores, medendi ratio-
 nem, huic gravi malo apprime accomodatvm
 instituere, non oblitus est; mandavit enim ut
hi omnes, quocunque modo possint, de corpore elu-
 erentur. Quod magnum autem ad efficien-
 dum, ut quando effectum fuisset dignoscen-
 dum, tale reliquit lectoribus suis praeceptum:
 “ Rite non curatum malum, nisi palle scat in-
 “ ster mortui aeger, nisi emacietur prorsus, nisi
 “ alimentis inter curandum quam minime pin-
 “ guibus nutriatur, nisi tamdiu protrahatur
 “ ipsa curatio, donec *antiqui humores* omnino
 “ de corpore migraverint.”—Dirae quidem vo-
 ces et quas “ horresco referens!” Rare enim
 est, Pathologiam istam, quae per tot annorum
 series pessumdedit medicinam (quae nil in mor-
 bis praeter Humorū peccata respicere sole-
 ret) ut observare possimus, tam diros edentem
 effectus. Et disciplinae quidem quam ita ex-
 coluit Boërhaavius dum elegantiam admiremur,
 plurima ista quoque mala, a medendi rationibus
 tam pestiferis necessario orientia quod tempus
 in scholis ejus valeret auctoritas, ploremus quo-

que necesse est. Illud autem cum magno humani generis fructu, a medicis tandem reperi-
tum est, sanari posse siphylidem sine detractio-
nibus fluidorum. Quoniam tamen nullas fere
medicamentorum vires agnoscerent medici, ni-
si illas quibus humores educerentur; et quod
hujusmodi facultatem non amplius Argento vi-
vo ascribere potuissent, hoc ignoto prorsus mo-
do agere, et cum istis, quae *Specificorum* dis-
tinguuntur nomine religari oportere remediis,
affirmabant. Adhuc tamen Boërhaavii Meden-
di Rationes, invitis animis, reliquisse videntur.
Argentum enim vivum, inter Evacuantia Reme-
dia etsi collocari debere negent, inter *Alteran-*
tia autem illud procul dubio adnumerandum
esse, sat acriter contendunt. Neque quisquam
ante Cullenum veras hujus metalli vires rite
perspexisse invenitur. Is enim Argentum Vi-
vum medicamentorum generi cui certissime per-
tinet, restituit primus. Id namque inter *Sti-*
mulantia posuit egregius vir, atque omnes, et
in Siphylide, et in aliis morbis quas exhibet fa-
cultates, a solo ejus deducit stimulo.

Si argumentis illius quicquid adjiciendum
esset, hisce quoque quae sequuntur confirmari
posset opinio.

1. Alicui corporis loco applicato Argento
Vivo, succedunt et partis rubor, et humorum
concurfus. Sic salivae movendae causa datum,
omnes inflammationis gradus a rubore simplici
ad gangraenam usque, concitasse, saepius ob-

fervatum est *. Ita tamen orientia ulcera, ab istis summa cura distinguenda sunt, quae morbo ipso originem trahant. Idem quoque inguinum glandulis admotum medicamen, effectus omnino similes ostendit. Illic enim majore quam sat erat copia transmissum, ut in bubonibus sanandis frequenter accidit, adeo vehementer agit, ut stimulo suo non raro cieantur ulcera, quae postea insanabilia fere evadunt.

2. Majorem vim, velut stimulantia alia, in foeminas, quam in viros, idem excercet remedium.

3. Illos quoque homines vehementius afficit qui debiles sint, et mali habitus. Hinc Podagri atque Scorbutici minus commode argenti vivi administrationem, parcissimam quidem, patiuntur. Qui strumis laborant, velut vulgo imbecilli, hujus quoque medicamenti, Huntero teste, majorem semper impetum experiri solent.

4. Utriusque sexus infantes atque pueri, violentia hujus, aequae ac alicujus stimuli, moventur magis, quam aetate provectiores. Hinc si quando illis administretur remedium, maxima observatione opus erit.

Hisce solis argumentis, quibus adjici multa possint, Argentum Vivum inter stimulantia remedia rectissime adnumerari, ac nulla vi nisi stimulante, in morbis prodesse, sat lucide apparebit. Quo autem concessio, major subit difficultas. Rogari potest enim, si haec ita sint, cur

* Vid. Graing. Mon. Siph.

non omnia alia stimulantia, ac argentum vivum, siphylidi aequè feliciter occurrerent; quod certe nemo sanus adfirmabit. Neque hanc difficultatem solvit eximius Cullenus. Hinc itaque, argenti vivi in actione, aliquid proprii, vel ut loquuntur *Specifici*, inesse semper, omnibus fere medicis persuasum est. Inter quos Hunterus, etsi stimulum esse Argentum Vivum minime abneget, specialis tamen generis esse, semper pro certo habet: atque ut omnem Inflammationem Veneream a Specifica causa oriundam esse tradidit, ita huic inflammationi argentum Vivum, non, nisi per quandem facultatem propriam occurrere posse, simili modo instituit. Supra autem ut mihi tentatum fuit, opinionem illius de natura morbi oppugnare, et Inflammationem Veneream ostendere nullius momenti re ab Vulgari differre, sed eandem sibi Causam omnino vindicare Proximam; nunc quoque id mihi adgrediendum est, ut demonstrare coner, non *Specificum Remedium* esse Argentum Vivum, sed ut Stimulantia omnia alia eodem prorsus modo in corpus agere.

Quod autem ad Stimulantia in genere attinet, inter hoc medicamentorum genus, non levis quidem momenti intercedere differentiam, haud praetermittenda est observatio. Alia enim quando in ventriculum assumpta fuerint, vim suam stimulantem minime ad illum cohibent, sed late per corpus edunt, atque per omnes etiam extremas partes, statim diffundunt. Quod ita penitus et celeriter agant hujusmodi remedia,

quorum exemplum vinum fit, nuper haud absurde *Stimulantia* nuncupata sunt *Diffusibilia*. Eorum autem stimulus etsi pro tempore sat validus, non tamen perdurat. Potestatis enim digerentibus perdomari ita et mutari solet, ut in sanguifera tandem receptus vasa, et pristinam suam virtutem ammitteret, atque Diffusibilium modo agere omnino desineret.——Alia contra ejusdem generis remedia, dum in ventriculum recipiuntur, nec latè corpus afficiunt, nec ullam fere nisi quam attigerint partem, incitare pollent. Etsi minus diffusibilia, non tamen alteris quoque imbecilliora, putanda sunt. Principio enim potestatibus digerentibus nec solvendo nec distruendo gaudent, quo non modo, virtute intacta, in sanguifera recipiantur vasa, sed easdem prorsus quibus instructae intraverent corpus vires, per totos eorum tractus, incolumes reservent. Ad quod autem posterius Stimulantium genus pertinere videntur et Argentum Vivum, et quaecunque medicamenta alia in sananda siphylide efficacia reperientur. Tali enim principio gaudere Argentum Vivum, nulla abest evidentia. Si quando enim per os administretur metallum hoc, postquam per stomachum atque intestina transierit, postquam per omnia sanguifera vasa migraverit, denuo postquam per arteriarum minutissimarum furculos minutissimos pervaserit, iisdem prorsus viribus quibus ante ingressum corpus valeret, ut in saliva et cutis exhalatione videre est, dotatum illud nunquam non inyc-

nimus. Etsi a caeteris tamen hac proprietate fat quidem mira, Simulantibus differat, quatenus autem *Stimulus* suus respiciatur solus, quo omnis collocatur virtus, ejusdem prorsus ostenditur esse naturae. Ubicunque enim attigerit corpus, vasorum et tonum et rubor auget, ipsa in contractiones validiores concitat; neque ulla in re, praeter angustiores suam actionem a diffusibilibus discrepat, propter quam autem nullas fere nisi quibus recte admotus fuerit partes, stimulare potest.

His itaque rite perpendis rebus, magnum illud forsan exquisitum, cur in curanda Siphylide ita prae stimulantibus caeteris polleat Argentum Vivum, facilius erit explicare. Supra enim memoratum fuit, omnem Inflammationem Veneream semper loco contentam, semper veneri puris stimulo concitatam esse: hunc autem adeo vehementer agere solere stimulum, ut violentia ejus partis laborantis confecta vascula, in laxitatem magnam et atoniam inciderent, ita quidem ut quae inde oriatur inflammatio sit perpetuo *Asthenici* generis. Si ad hujusmodi curanda mala minus prodesse Diffusibilia stimulantia, quid mirum? Horum enim remedium per totum corpus late distribui solet et dissipari vis, parum ergo ad quamlibet singulam partem, minimum tamen ad angustam adeo morbi sedem, veneri scilicet ulceris, vel ulcusculi potius inflammata vascula impertiri necesse est; et si quid autem, quale sit, impertiatur, id, propter eorundem vascu-

lorum debilitatem, non multum posse afferre opis, putandum est. Quod idem in vulgari-um ulcerum curatione videre est, quae si aequae parva ac venerea extent, nil fere accipere affue-runt adjumenti a remediis communibus. Hunc autem localis stimuli defectum large suppeditat Argentum Vivum. Qua nititur enim facultate, intactis viribus permeandi et concoctionis vias, et sanguifera vasa, tandem vascula ulceris vene-rei debilitata adit, minutissimos eorum perva-gatur ramulos, atque per totos eorum tractus ubicunque latera attigerit stimulando, (ut in omni autem attigerit puncto necesse est) ita to-num atque robur augêt, at pars venerei viri prius confecta stimulo, ad sanitatem demum re-ducatur. Quem autem ad medicamenti hujus effectum, altera quoque res non leviter conferre videtur. Aut faucibus enim aut summo cor-pore perpetuo sita reperiuntur omnigena siphylitica mala, quibus etiam, prae caeteris, locis, seu quantitate largiore, seu efficacior vi, nun-quam non adferri solet Argentum Vivum.

Hae itaque omnes si simul conjunctae suman-tur res, nonne concludere licet, hujus remedii stimulum minime *Specificum* esse, sed, quod prae caeteris Stimulantibus, tantum in Siphylide pro-fit, huic solae ejus Facultati ascribi debere, *qua et concoctionis et sanguinis circuitus effectus sine mu-tatione tolerare possit, et ubi situs fuerit ipse mor-bus, in illa tandem corporis loca, stimulum suum exercere integrum?*

Quae cetera Medicamenta in hoc morbo inter medicos utilia esse agnoscantur, haec ex Plantarum genere fere desumuntur, vel Acrium vel Aromaticum. Quia conjuncta simul administrare mos est, major quaedam subest difficultas, in eorum virtutibus aestimandis. In ple-
risque tamen quale in Argento Vivo tale principium inesse, simili modo reperietur.

DE ACRIBUS.

Hujus generis Medicamenta stomachum atque quas attigerint partes sat valide stimulare solent, vix autem ullam possidere efficaciam, in loca corporis remota. Haec tamen quoque principio illo pollere quo per ventriculum et sanguifera vasa, intactis viribus, migrare possint, facillimum erit demonstratu. Nullum enim fere eorum est quod hujus rei non planissima praebebit indicia. Ita exempli causa, Scylla, aut Cepa, aut Allium, si quando in stomachum recipiantur, ut caetera hujus generis medicamenta, totius corporis gustu atque faetore suo ad secretionem omnes inquinandas, quam apta sunt, nemini ignotum est. Inter nostrates autem, nullum fere nisi Daphne Mezereon, ex hoc plantarum genere, administratum invenimus. Ea decocti forma adhiberi solet, quod plantae drach. ii. in aquae lb. iii. coquendo, donec ad lb. ii. reducatur latex, perficitur. Apud exteros tamen plures in usum veniunt. Septentrionali

enim in America, Lobeliae Siphyliticae radicis decotum, postquam ei Ranunculi abortivi Radicis paullulum adjectum fuisset, Venereo morbo implicitis, atque felicissimo cum eventu, datur. Quod duo homines fide dignissimi nuper ita testati sunt, ut Indi, medicamenti hujus, quam in Europa, Argenti Vivi adminiculo, nostri, ad sanitatem multo citius revocari dicantur *.

DE AROMATICIS.

Aromaticorum quae in Siphylide prodesse agnoscantur praecipua sunt Guaiacum, Sassafras, Lignum Rhodium, Santalum album et Rubrum; quibus si addentur Sarsaparilla, Glycirrhiza, Mezereon, atque Stibium Crudum, fit celebris Decoctio Lusitanica. De quibus longe potentissimum est Guaiacum, cujus autem et si adeo jactentur vires, revera tamen profuisse, eae non saepe inveniuntur. Licet enim, in regionibus terrae meridionalibus id ad Siphylidem profligandam satis efficax videatur, * attamen in septentrionalibus hisce, ad idem obeundum munus, vix solum sufficit. Comperit enim experimentis suis Hunterus, hoc externe applicato medicamento sanari posse secundarii generis ulcera; et internè dato, sublevari certe

* Vid. Swed. Pract. ob. on Ven. Dis. chap. 21.
 † Vid. Swed. P. T. on Ven. Dis. p. 258.

omnia Siphylidis signa; utraque tamen non ita penitus, ut nullus postea reditus extimésceretur morbi †. Hinc itaque ad delendam prorsus siphylidem, quamvis impar evadat Guaiacum, ad sistendum tamen ab ingravescendo malum, sat illud semper valere, existimatur Hunterus: haud levis quidem momenti res, si forte quae causa prohiberet, quod argento vivo ipso minus commode uteremur.

Quod ad Sarsaparillam attinet, hanc nullo modo Siphylidi prodesse vel externè vel internè datam, institutis de proposito experimentis, idem Hunterus eruit *. Si quando casu in ullo auxilium attulisse putaretur, id magis tribui oportere verisimile est, tepidi potus simul sumpti quantitati largae, quae summum corpus, Luis specialem Secundariae sedem, quoddammodo incitare nunquam deficit, quam cuinam ipsius radicis virtuti.

De Facultate autem qua in Venereum Morbum polleat hoc medicamentorum genus, major adest dubitatio. Haec enim ad Diffusibilia stimulo suo quoddammodo appropinquare fatendum est. In calidis certe regionibus Arcmata, ad siphylidem sanandam, multo magis accommodata videntur, quam sub Europae frigidiore coelo. In his enim regionibus, longe mitior, quam apud nos, evadere solet morbus, ita ut quae nunquam fere hic defunt faucium

* Vid. Hunt. Treat. on Ven. Dis. chap. 6. S. 14.

† Ibid.

ulcera, vix illic, omnino cognoscerentur. Tale autem in hujusmodi remediorum plurimis inesse principium, quale in Acribus et Argento vivo reperitur, quo scilicet concoctionis et sanguinis circuitus viribus resistere possint, non defunt quae suadeant argumenta. Hoc enim in Rosae stillato oleo manifestum est, quod odorem suum incolumem retinet, postquam et stomachum transgressum, et sanguifera vasa. Idem aeque perspicuum est in Balsamis et Terebinthinis, quae efficaciam suam in Gonorrhoea secundaria suppressenda, a principio hujusmodi pro certo derivant. In urina enim, si quando administrantur, et sapor eorum, et specialis semper deprehendi possit odor; luculento indicio, ea per corpus immutata transisse, et virtutem suam in sedem ipsius morbi recte exercuisse, integram. Nec Guaiacum quidem, hujusmodi remediorum longe validissimum, hoc modo agere, multum a verisimilitudine abhorret *. Administratum enim semper illud sequitur, et cutis infuetus calor, et exhalatio larga.

* Transire per secretiones corporis omnes solere medicamentum hoc, illo qui sequitur casu sit manifesto apparebit. Mulier quae nutrix lacte suo infantem alebat, Guaiacum forte usa est, ad Morbum Articularem levandum. Quoties medicamentum assumebat, alvi fluxu corripiebatur infans, quo autem relicto, infans quoque morbo liberatus est. Exhinc perspicuum est, mammae mulieris glandulas immutatum intrasse Guaiacum, atque infantis ad intestina unà cum lacte perlatum, ibi vim suam purgatricem exercuisse.

DE STIBIO.

In Siphylide Stibium prodesse, atque in Decocto Lusitanico haud inutilem partem conficere, apud omnes convenit. Idem si cum Argentum Vivo comminuetur, ut in Pilulis Aethiopsicis, et Aethiope minerali accidit, in cutis morbos, qui hoc metallo solo insanabiles restitissent, valuisse invenitur. Hoc autem principium immutabile possidere, cui quam creet de cute ascribi debeat exhalatio, nec improbabile, nec saltem conjecturare nefas est. Nulla tamen experimenta novi, de materia exhalante instituta, quibus haec res jam adhuc evicta fuerit.

DE OPIO.

Multum quoque in curanda Siphylide nuper celebratur opium, etsi qua veritate, non dicere ausim, adeo de illo contraria extant testimonia. Ad hunc autem depellendum morbum illud non adeo accommodatum esse, magis verisimile mihi videtur. Luis enim venereae prorsus localia sunt universa signa, dum hujus medicamenti, utpote Stimulantium diffusibilium principis, communes omnino reperiuntur effectus. Perutile certe evadere possit ad quaedam sublevanda signa, atque aegrotantium sustentandas vires.

His, de praecipuis remediis quorum in Syphylide inclaruit usus, memoratis rebus, proximum est, ut de signorum ejus variorum curatione, paullo strictius dicam. Atque hic observasse pene supervacuum erit, in hac re omnibus aliis semper anteponendum esse Argentum Vivum. Quod autem ad istam quaestionem attinet, quae maxime profint hujus remedii Compositiones, de ea quidem re, non omnino inter medicos constat. Eae mihi certe optimae videntur, quibus et in particulas minutissimas dividatur metallum ipsum, et quam integerissime conservetur simul metallica sua natura. Sub hoc autem comprehenduntur genere, Pilulae vulgo dictae Mercuriales, unguentum Mercuriale, Plenckii Mercurius Gummosus, Mercur. Precipit Niger, vel Celebris Black Cinereus; et ante omnes Mercur. Calcin. per se; quae caeteris universis longe anteferendae sunt. Salinae quae nominentur Compositiones, eo quod naturae metallica minus retinent, externe melius, quam interne, dantur. Quod ad quantitatem spectet qua administrari debet Argentum Vivum, id a statu corporis aegri solummodo pendet. Semper autem a quantitate parva incipere debemus, quae deinde paulatim augenda est, donec a gustu in ore percepto, spiritusque factore, vasis inesse remedium, omnino absit dubitatio. Tum protinus sustendum est; his enim perspectis notis, jam omnes quascunque possidet vires exercere Argentum Vivum,

scire licet.—Subinde accidit, quando de his compositionibus quaedam administratae fuerint, ut concitentur vel tormina vel alvi fluxus, praefertim autem, si detur vel Calomelas vel Mercurius Calcinatus. Haec autem facile praecaveantur mala, si quicquid simul adhibeatur, quod stomachum et intestina roboret; atque in hunc finem optime respondet opium, vel stillata Aromaticum olea, quae una cum Argento vivo assumi debebunt.

DE ULCUSCULI CURATIONE.

Simul ac spectetur ulcusculum venereum, si non admodum late serpsit, protinus adurante aliquo extirpandum est. Ad hoc autem efficiendum, optimum est Causticum quod Lunare dicitur, quo bis vel semel die tangendum est, donec crusta formetur, et pars viro infecta prorsus tandem deleatur. Quo facto nihil aliud requiritur, nisi ut paululum argenti vivi administretur, ad omne melius prohibendum periculum futuri morbi. Sin autem latiora evaserint ulcuscula, ita ut minus respondeat hoc curationis genus, tum alia quoque adhibenda. Aliquo de Argenti vivi salibus, bene cum aqua diluto, veluti corros. sublim. eluere illa debet aeger; vel si hebetiorem indolem prae se ferrent, praecipitato rubro leviter inspergere. Si haec minus valeant, aqua Vitriol. Camphor. perfundantur, vel potius Aurichalci inspergantur.

pulvere, qui testante Schwediaur, localium omnium in ulcuscula efficacissimum longe est remedium. Quod ad interna medicamenta spectet, nullo fere opus erit nisi Argento vivo. Si quando urgeat Phlegmon aut Erysipelas, illi, sanguinis detractiōe, vel ex parte laborante, vel incisa vena; huic autem, quia gangraenam minitet, vino et peruviano cortice occurrendum est.

Phymosis et Paraphymosis ulcuscula stipantes nil proprii requirunt, eodem namque prorsus modo curentur, ac si ulla alia causa fuissent orta. Neque quae superveniant ulcusculis vitia, speciale aliquid desiderant. Ad praeputium attenuandum, quando iusto crassius evaserit, Unguentum mercuriale~~m~~ fortiss, atque per partem ipsam transmitti scintillam electricam, Hunterus imperat.—Verrucae scalpello aut caustico destruantur, vel quod minus incommodi affert, Sabinæ pulvere. Si unquam ad carcinoma spectarent ulcuscula, sine mora excidenda.

DE BUBONIS VENEREI CURATIONE.

Bubone autem ulcuscula excipiente, eum quam celerrime discutiendum esse, inter scriptores omnes recentiores convenit. Ad quod efficiendum, unguento mercuriali cutem persficare, cursu quo tendant absorbentia vascula, optimum est; ita fit enim ut cito et recte applice-

tur medicamentum partibus morboſis iſſis; atque unguenti hujus, de axungiae et Argenti vivi portione aequali compoſiti, drach. i. unaquaque die illiviſſe, plerumque fere ſat erit. Feminibus interioribus, inferiori abdomini, vel genitalibus iſſis, prout res poſtulet, inungendum. Si bubonem comitentur Phlegmon aut Eryſipelás, eandem recipiunt curationem, ac cum ulcuſculis ſuperveniant. In ſuperiore autem caſu, ſcilicet phlegmone etiam graviffime urgente, nihilominus ut continuetur argentum vivum ſuadet Hunterus eximius, cui autem medendi rationi nec ut opinor, ſine cauſa adverſatur Schwebdiaur. Si detur enim ſtimulum eſſe medicamentum hoc, quod vix forſan negari poteſt, ut inflammationem jam ſatis gravem, id non gravio-rem redderet, quomodo exiſtimandum eſt? Id certe concludere licet, vel argentum vivum, vel ſanguinis detracti-
onem, quae remedia prorfus contraria ſunt, vel unum vel alterum, minus ad huiusmodi caſum conferre. Huius ergo metalli uſum per tempus aliquod intermittere, donec conquieverit paullulum inflammatio, utilius forte videbitur.—Si quando utraque inguina occupaverint bubones, ſuppuraffe eos prohibere vix fere poſſibile evadit; ad hoc enim praecavendum, tantum argenti vivi requiritur, quantum nullius pene aegri vires ſuſtinere poſſint. Poſtquam ſuppuraffent autem bubones, velut abſceſſus alii tractandi ſunt, eo tamen excepto, ut ſcalpello non aperirentur, ſed ſibi ip-

sis sui effusio relinqueretur puris. Ad futuram prohibendam luem, pro virili simul administrandum est argentum vivum. His enim rite observatis rebus, facile plerumque sanantur bubones. Contra autem si quos vetustas longa occupaverit, si scalpello olim incisi, atque per longum tempus argento vivo curati fuerint, tum difficillime ad sanitatem perducuntur. Iisdem tamen prorsus stimulis adgrediendi sunt, qui in ulceribus veteribus non veneri generis, efficaces reperiantur. Atque eidem rei mag-nopere quoque profint lignorum decocta.

DE LUIS SECUNDARIAE CURATIONE.

Facile plerumque sanantur faucium atque palati ulcera, quia ad illos prae caeteris partes argentum vivum, vel majore vi, vel largiore copia, adferri solet. Praeter remedii hujus administrationem autem, adstringentibus quoque lenibus gargarizare prodest, velut peruviani corticis decocto. His tamen impletis ulceribus non protinus sistendum, nec morbus ipse pro extincto habendus est. Per mensis saltem spatium continuare debemus argentum vivum, eo enim neglecto, quadam alia corporis parte, siphylidem postea erupturam esse, expectandum.

In Maculas, aliaque cutis vitia, ut et inci-

piencia ossium mala, optimum remedium est frequentissime in balneum calidum descendere. Hoc enim arcanum videtur, quo, adjuvante insuper calidiore coelo, in Continente medicinam facientes nixi, venereis istis adeo feliciter occurrere callent affectibus, qui hac in insula, medicamentorum viribus resistere prorsus inveniuntur. Quò efficaciora redderentur balnea, addendum est furfuris decoctum, atque Sublim. Corros. Semun. aquae duobus utrisque congiis. Idem quoque sal interne datum, in hujusmodi cutis vitia magnopere prodesse observatur; et hic fere unicus casus est, de Argenti Vivi salibus, quo ullum internè administrari debebit.

Nodos atque Tophos a siphylide oriundos, quod ad causam suam attinet nullo modo variasse, ab iis qui alias concitentur, memoravi supra; quod ad medendi rationem spectet, eosdem minime differre, nunc quoque observandum est. Hanc enim rem luculenter commonstravit celeberrimus Russel, qui in ossium, quae vulgo accidunt, inflammationibus, argentum vivum externè atque internè datum, ut et mezerei decocta, semper aequè prodesse invenit, ac in affectibus earundem partium vere siphyliticis; quod idem comprobavit medicorum aliorum experientia. Hebetioris generis ut perpetuo inveniatur siphylitica ossium inflammatio, ad illam depellendam locales stimulos validissimos, epispastica veluti ac emplastra calida, Hunterus im-

perat; quae si minus valuerint, tum partes super ossa vitiata altè incidendas esse, idem praecipit.

Quando a siphylide indurescat aut exaspere-
tur summi corporis caro, eadem fere profunt
ac in ossium inflammationibus. Si Tubercula
orirentur, quatenus sua spectetur causa, nil pro-
prij requirunt.

Ophthalmia Venerea, praeter adhibitum ar-
gentum vivum, eodem modo curatur, quo ocu-
lorum inflammationes quae aliis ex causis ori-
untur: quod idem de Surditate Venerea ob-
servari potest.

His de Venereorum morborum curatione spe-
ciatim dictis, hoc commune de omnibus prae-
ceptum, addidisse haud alienum erit: quo magis
uteretur, semper eo debilius agere Argentum Vi-
vum, et ad depellendum morbum, ineptius per-
petuo evadere; hinc igitur, illo per longinquum
tempus sine fructu administrato, conferre max-
ime, vel ut compositio prius adhibita pro alia
mutaretur, vel ad caetera ut confugiatur reme-
dia, quae jam nota fuerint profuisse morbo.

QUOMMODO AEGER CONTINENDUS EST

D U M

ADMINISTRETUR ARGENTUM VIVUM.

Remedium hoc, stimulantia velut omnia, in imbecillos quam in robustos semper majore impetu adferri solet: etsi administratione enim ejus parvum incommodi patiantur validi, ab infirmis tamen, multo magis exstimescendum est. Ad haec igitur praecavenda, quae aliter orirentur mala, ut vires aegri rite sustineantur, summa observatione opus erit. Quam ad rem autem confert maximè externus calor, qui ut stimulorum omnium potentissimus, ita in summum corpus directè agit, et sedem ipsius morbi, et locum qua remedium ipsum vehementius concurrere solet. Hinc itaque in conclavi cui frigus arceatur, continendus aeger, et indusiis laneis amiciri debet. Neque tamen foris progredi, modo sinat temperatius coelum, prohibendus est; nil enim, quod notum omnibus, ad roborandum corpus magis pertinet, quam exercitationes sub dio factae. Cibus autem quem idem capiat, cum quam maximè alentis generis esse, praeterea confert; neque quicquid vetat, ne aegrotanti simul modico indulgeatur vino. Quae itaque si rite peragantur res, omnia prosperè cessabunt, atque nihil majus ab argento vivo periculi suberit, quam ab ullo alio administrato stimulo.—Aliquando tamen contraria

prorsus necessaria eveniunt. Interdum enim ita validi reperiuntur homines, ut nisi quodammodo fractae fuerint eorum vires, illi, nihil commodi ex medicamento hoc, ne effectus quidem, experirentur. Cujus rei, praeceptor olim meus, atque mihi semper honorandus illust. IRVINE *, de quoddam aegro suo, exemplum unum referre solebat. Homo validissimus, qui siphylide laborabat, dum usitatos cibos, atque exercitationem solitam sibi permetteret, argento vivo, per longum tempus incassum usus est. Suadente tandem medico, ut domi sedulo sese teneat, atque tenuiori victu, utpote de lacte praecipue confecto, sese restringat, infirmus adeo, et ad medicamentum recipiendum evasit aptus, ut debellato morbo, pristinam cito post recuperaverit salutem.

* In prael. de Mat. Med. hab.

DISSERTATIO MEDICA,
INAUGURALIS,
DE
VARIOLA.
QUAM,
ANNUENTE SUMMO NUMINE,
Ex Auctoritate Reverendi admodum Viri,
D. GULIELMI ROBERTSON, S.S.T.P.
ACADEMIÆ EDINBURGENÆ PRÆFECTI;

NEC NON

Amplissimi SENATUS ACADEMICI consensu,
Et nobilissimæ FACULTATIS MEDICÆ decreto;

PRO GRADU DOCTORIS,

SUMMISQUE IN MEDICINA HONORIBUS ET PRIVILEGIIS
RITE ET LEGITIME CONSEQUENDIS;

Eruditorum examini subjicit

JACOBUS MACKNIGHT,
BRITANNUS.

Nunc ego te affectus omnes et signa docebo
Contagis miserae. —————
Forte etenim nostros olim legisse nepotes,
Et signa, et faciem pestis novisse juvabit.
Namque iterum quum fata dabunt labentibus annis
Tempus erit, quum nocte atra sopita jacebit
Interitu data: Mox iterum post secula longa
Illa eadem exsurgat, coelumque aurasque reviset,
Atque iterum ventura illam mirabitur actas.

FRACAST.

Prid. Id. Junii, hora locoque solitis.

EDINBURGI:

Apud BALFOUR et SMELLIE,
Academiae Typographos.

M,DCC,LXXVII.

Viro eximio

JACOBO GREGORY, M. D.

Institutionum Medicinæ,

In Academia Edinensi, dignissimo Professori,

Ob consilia et amicitiam;

Nec non,

Viro optimo

THOMÆ HAMILTON,

Anatomiae et Botanicae,

In Academia Glasguensi, Professori,

Propter benevolentiam et urbanitatem,

Hoc opusculum,

Animi grati testimonium,

Sacrum voluit

A U C T O R.

DISSERTATIO MEDICA,

INAUGURALIS,

DE

VARIOLA.

DEFINITIO.

SYNOCHA contagiosa cum vomitu;
et ex epigastrio pressio dolore.

Tertio die incipit, et quinto finitur eruptio papularum phlegmonodearum, quae spatio octo dierum in suppurationem, et in crustas demum abeunt, saepe cicatrices depresso, sive foveolas, in cute relinquentes.

HISTORIA MORBI.

VARIOLA BENIGNA.

Hujus morbi adventus interdum per paucos dies, languore, lassitudine, et ad sudandum

dum proclivitate, annunciat. Ab ipso impetu, algor calorque invicem succedunt; ac progressu horror, praecipue circa vespere, invadit, per quasdam horas manens, et in cutis ardentiam, capitis dolorem, et sitem abiens; saepiusque nausea, vomitus, lumbago, et ex epigastrio pressio dolor, ea comitantur. Symptomata noctu saevius urgent; mane autem ex sudore leniuntur; nihilominus quidem febris aliquid cum languore multo et hebitudine manet.

Die secundo a morbi insultu, omnia supra dicta symptomata violentius vespere redeunt, cum anxietate, pervigilio, et interdum delirio. Exacerbationes remissionesque saepe se bis die ostendunt. Nonnunquam vero periodi regulares omnino absunt.

Die tertio, cum sudatione universa, pustulae quaedam erumpunt. Eodemque fere tempore, symptomata levantur, atque, morbo mitissimo, fere omnino evanescunt. Interdum, adveniente eruptione, infantes sternutatione et convulsionibus afficiuntur. Febris vespere rursus parum cietur, atque pari modo,

modo, adveniente die, et pustulis erumpentibus, remittit. Talis exacerbatio vespere iterum redit; die vero quinto, novissimis fere erumpentibus suum cursum febris explevit.

Pustulae, quantum licuit observare, eodem fere tempore in facie, et in partibus artuum carnosis, comparuere, posteaque in ipso corporis trunco.

Pustulae, quum se primum ostendunt, maculae sunt exiguae et rubrae, neque cuti eminentiores, at brevi visui prominentes, atque tactui et firmas et acuminatas fiunt. Hoc maxime hunc morbum a rubeolis distinguit, quae quidem, vix visui prominentes, levissimo tactu, non cutem altius premendo, percipiuntur.

Pustulae indies conicae crescunt, atque circa diem eruptionis sextum magnitudinem summam attingunt; harum saepe quaedam magnitudine pisi, vel etiam grandiores, sunt. Faciei pustulae crebriores et minutiores sunt, et plerumque, a pectore ad corporis extremitates, et numero et magnitudine auferuntur.

Ad diem quartum, pustulae coloris subrubri sunt; tum in summis earum albida puncta

puncta apparere incipiant, augescientia paulatim ad diem sextum ; tunc ex toto subalbidae fiunt, cum rubris basibus latis, adeo ut, si plures sint, interstitia fere aequae rubescant. Haec primo in facie, deinde in corpore toto, apparent. Postea interstitia minus rubent, atque pustulae paulatim flavescent, donec in crustas abeunt. Humor pustularum est primo serosus, postea autem puris veri speciem induit.

Quum pustulae non admodum paucae sunt, cutis tensio ac tumoris faciei aliquid earum suppurationem semper comitantur. Faciei tumor, morbo benigno, non ante diem quintum apparet, at interdum adeo augetur, ut palpebrarum tumore oculi prorsus claudantur ; idque citra ulla pustulas in palpebris saepius accidit. Ubi morbus admodum vehemens est, oculi, praesertim in infantibus, ab ipso eruptionis initio, clauduntur. Tumorem vero faciei et cervicis insignem, faucium inflammationem, et difficultas deglutiendi, semper comitantur ; haec vero symptomata, nisi morbus vehementior sit, raro molesta sunt.

Febris,

Febris, ut supra diximus, morbo benigno, et eruptione finita, prorsus desinit; et quum pustulae paucissimae sunt, in suppurationem et in crustas abeunt, sine ulla molestia, aut ullo febris symptomate; hoc tamen raro accidit. Quum pustulae paulo crebriores sunt, febris aliquid earum suppurationem semper comitatur, et praesertim quidem magna pulsuum frequentia, qualis in alio morbo lethalis existimanda esset, etsi in hoc minime meteunda sit. Circa morbi crisin, calor, sitis, dolor, anxietasque aegrotantem vexant, atque saepe jactationem et pervigilium inducunt. Haec vero symptomata, cum faciei tumor subsidit, et pustulae arescunt, omnino abeunt.

Pustularum suppuratio plerumque finitur circa diem septimum; die postero flaccidae fiunt. Quod fit puris exudatione per cuticulam; et id, uti cera esset inspersa, in faciem concrevit; at in caeteris partibus corporis linteis abstergitur. Haec exudatio pergit, donec in crustas abeunt. In adultorum extremitatibus, ubi firmior est epidermis, lentius procedit; nam decimo octavo pustulas
die

die pure expletas, novaque cuticula obductas, mihi incidere licuit.

Crustrae variolae benignae paucis diebus decidunt, atque cicatrices nullas in cute relinquunt. At, morbo violentiore, diutius adhaerent, et, iis decidentibus, rubra tubercula manent, quae quasi squamulae albae decidunt, donec foveolae, sive cicatrices cavae, per vitam manentes, in facie maxime fiunt.

V A R I O L A M A L I G N A.

Variola maligna per sua stadia celerius quam benigna, et cum symptomatibus ferocioribus, decurrit; febris ante eruptionem saevius urget, cum perpetuo, praesertim in adultis, vomitu, quandoque delirio inflammationeque faucium.

Die plerumque secundo tertioque interdum a morbi insultu eruptio incipit, citoque progreditur sine levamine symptomatum. Quo citius eruptio incipit, eo fere vehementior est morbus. Pustulae fere discretæ erumpunt; secundum vero numerum earum,

earum, progrediente suppuratione, plus minusve saepe cohaerent. Id saepe in facie fit, quum in caeteris partibus corporis omnino discretas apparent, attamen frequenter confertae erumpentes ex parte cohaerent. At, si pustulae creberrimae sunt, in corpore toto cohaerent, passimque in vesiculas saepe confluunt. Atque eruptio, malignissimo morbo, ut inflammatio erysipelatosae, citra pustulas discretas provenit; id saepius in facie, raro in corpore toto, contingit. Pustulae frequenter numerosae in ore se usque ad fauces ostendunt.

Symptomata post eruptionem, praeter vomitum, omnia manent. Exacerbationes in toto morbi decursu vespere adsunt.

In morbi progressu, symptomata febrilia ingravescent, atque cervix et facies immodice tument, cum inflammatione faucium, difficultate deglutiendi, et in adultis cum ptyalismo.

Facies, malignissimo morbo, ab ipso eruptionis initio tumescit, ibique in progressu pustulae fere cohaerentes membranaceae fiunt, dein squamulis albis scabrosae, tum de-

num circa diem septimum subnigrescentes
arescunt.

Inflammatiō foeda faucium intumescenti-
am graviolem faciei cervicisque semper co-
initatur, quae gravissima est, prout suffoca-
tionem minans, et aliquando deglutitionem
prorsus impedit.

Quum faucium inflammatiō citius invadit
ac gravior fit, in iis qui plus octo annis sunt
nati, eam salivatio copiosa semper comitatur.
Quae molestiae est aegrotanti, quoniam in-
dole ejus acri saepe os faucesque excoriantur.
Circa crisin, viscosa tenaxque fit, ut difficilli-
me, neque absque periculo suffocandi, excre-
atur, et, subsidente faciei tumore, omnino de-
cedit. Infantibus rarissime adest, qui qui-
dem, in ejus loco, dicuntur diarrhoeam ha-
bere.

Suppuratione procedente, pustulae planae
et flaccidae fiunt, saepe cum acuminibus ca-
vatis in quibus nigra puncta videntur. Hu-
mor in iis contentus est modo transparens,
modo aliquantulo sanguinis tinctus; hinc
translucidi, rubri, lividi aut nigrescentis
coloris

coloris pustulae fiunt. Hoc, quoniam ex sanguinis dissolutione oritur, plerumque lethale evadit. Haec symptomata maligna, pustulis haud numerosis et ubicunque discretis, se saepe ostendunt, tametsi plus minusve fere confertae apparent.

Symptomata anomala, varia permagnum periculum indicantia, in stadiis morbi variis saepe invadunt, ut dolores abdominis colicam mentientes, dysuria, ischuria, urinae et dejectiones sanguinolentae, petechiae in pustularum interstitiis, vesiculae sero expletae, interdum rubri, lividi, aut subnigri coloris. Circa crisin, interdum pruritus intolerabilis aegrotum urgens ad cuticulam evellendam, partibus excoriatis gangraenosis.

Eodem tempore quo facies arescit, crisi favente, intumescencia ejus subsidit, manus, et postea pedes intumescunt; pustulae, in caeteris partibus corporis, ubicunque discretae sunt, prominent, ac pure expleantur; symptomata quoque febrilia levantur. Frequenter tamen, cheu, nimis sicquenter! nostris auxiliis frustratis, dum facies subsidet,

febris augeſcit, ſuperficies corporis ſe tota contrahit, puſtulae flaccidae vel etiam inanes fiunt, ſpiritus foetidus, lingua arida et nigra, cum pervigilio, anxietate, jaſtatione perpetua, atque delirio, ac demum ſuffocatio aut coma ſcenam claudit.

Morbo benigno, tumoreque faciei minimo, extremitatum intumeſcentia poſt criſin vix diſcerni poteſt; morbo vero vehementiſſimo, tumor praecipue manuum admodum notabilis fit; et, ſi aeger rite convaleſcit, paucos dies manet, et paulatim puſtulis ſaneſcentibus abit: Si vero ſupervenit heſtica, protinus evaneſcit. Intumeſcentiam iſtam quidam ex puſtularum inflammatione in his partibus oriri exiſtimaverunt, quod mihi equidem non veriſimile videtur; quoniam maturantur prius et areſcunt, quam ad ſummum intumeſcentia attingit. Oedema quoddam, aegroto convaleſcenti interdum pedes taloſque infeſtans, evenit; quod vero plerumque ſua ſponte abit, et auxilio medici minime eget.

Desiccatio pustularum, morbo benigno, primo in facie, deinde in ipso corporis trunco, tum demum in extremitatibus, paulatim ac lente per dies quosdam procedit. Sed, morbo maligno, celerius progrediens fere uno die perficitur. Hoc potissimum ex humore pertenui cuticulam promptius transeunte ori-ri videtur; forsitan quoque in sanguinem pars ejus absorptione refertur; namque interdum paulo ante obitum pustulae, sine signis exudationis certis, penitus inanescunt. Haud ab-simile est hanc absorptionem, inflammationem, caeteraque symptomata graviora circa crisin morbi accedentia, augere.

In variola maligna, pustulae sanationem aegre recipiunt, atque haud raro ulcera foeda infra crustas interdum nigrescentia fiunt, cum hectica, dyspnoea, ac diarrhoea, quae corpus et vires consumunt, atque mihi quidem non minus periculosa, quam ipsa morbi crisis, videntur.

Periodus hecticae, quatenus observare licuit, regularis non est. Post diem decimum incipit, modo paucis diebus, modo non nisi post

post decem terminatur. Hæctica ex sanie in sanguinem absorpta oriri videtur, quia, deficiente febre suppuratoria, incipit, neque, nisi pustulae sint ulceratae, invadit. Interdum erysipelas gangraenosum evenit; præcipue pueris, atque cito mortiferum fit.

Dies eruptionis octavus plerumque criticus est; tum symptomata aut levantur, ac aeger curationem recipit, vel ingravescent et aegrotum necant. Dies nonus et decimus maxime periculosi sunt; interdum tamen morbus adeo vehemens est, ut non post eruptionem, sæpeque non ultra diem sextum, aeger supersit. Dies hæcticae omnes, quantum vidi, a decimo quarto ad vigesimum, ab eruptionis initio, aequè critici sunt.

Divisio variolae in malignam, et benignam, quam in discretam et confluentem, multo præstat; quia symptomata malignissima, pustulis prorsus discretis, frequenter occurrunt. In benignae historia operam dedi, ut ea symptomata enumerarentur, quae ad morbum mitissimum pertinent; denique, casus omnes comprehendere conatus sum, quibus,

quibus, eruptione finita, febris omnino definit, et pustulae in veram suppurationem abeunt. Malignae historia, contra, potissimum enumeratio est symptomatum violentium et anomalorum, quae non proprie ad morbum pertinent; et casus omnes comprehendens, quibus febris aliquid post eruptionem nunquam deest, atque pustulae, sive discretae sive confluentes, in suppurationem veram non tendunt. Has inter divisiones nullam limitem ponere possumus. Quippe nimirum febris et alia symptomata maligna in ullo gradu, a violentissimo ad minimum perceptibilem, existere possunt. Et quidem, secundum numerum et gradum eorum, periculum est semper pendendum.

METHODUS MEDENDI.

Variola benigna vix ulla medela eget, solummodo aëre frigido puroque frui, et cibo animali, potu spirituofo, cardiacisque stimulantibus, abstinere oportet. Observationes sequentes praecipue ad malignam proposui, cui

cui auxilium medici peritissimi saepe frustra adhibetur.

Inter omnes convenit, quod variola periodum temporis quandam desiderat, quæ arte minime afficitur. Quocirca, in hoc morbo, est medici iri obviam symptomatis malignis, et morbum, quantum fieri potest, levare.

Qui observationes suas de morbis memoriae prodere velit, caute eorum stadia notare debet, quae ullam mutationem in methodo tractandi requirunt. Hunc morbum, cum hoc scopo, in tria stadia deduxi.

I. A morbi insultu ad diem quartum ab eruptionis initio.

II. A die eruptionis quarto ad morbi crisin.

III. A morbi crisi ad finem.

S T A D I U M I.

Conandum est, in hoc stadio, summâ ope febrem levare, ut eruptio non ante diem tertium proveniat, utque, procedente eruptione, febris levetur, atque finita, prorsus desinat, aëris frigidi, diluentium, balnei, clysmatum, venae sectionis, et emeticorum usu.

Ut aëre frigido et puro in omni febre aegrotus fruatur, omnino necesse est, atque praxis hodierna hoc quam maxime in variola prodesse indicare videtur. In spatioso cubiculo procul dubio quidem e lecto multum sedere utilissimum est; neque, ex meis observationibus, efficacius esse liquet sub dio spatium, etsi, in tempestate gelida et nivosa equidem, id nonnunquam praecepi. Interdum vero aeger e lecto surgere non potest, quin statim vomitu corripiatur, vel animi deliquium patiatur; tum quidem oportet leviter tectus decumbat, dum simul cavetur, ut aër in cubiculo subinde mutetur, et omnis calor externus sedulo praecaveatur. Denique e lecto, vel in spatioso cubiculo, vel sub dio, quantum ferri potest, manere, febrem mitigat, eruptionem moratur, forsitan quoque numerum pustularum minuit.

Cibo animali liquoribusque spirituosus, in stadiis omnibus morbi, abstinendum est. Cardiacae stimulantia quoque, vel volatilis vel aromatici generis, evitanda sunt. Cibum ex farinaceis et lacte, potum ex aquosis, vel
 aqua

aqua pura, dare oportet. Utpote in hoc morbo, quamplurimum potûs fumere debet, qui gratiores aegrotanti sunt dandi. Potus frigidus in hoc stadio commode adhibetur; at, suppuratione progrediente, ore ac faucibus excoriatis, tepido uti oportet.

Fovere extremitates, in puerisque etiam totum corpus, aqua tepida, febrem lenit, et somnum inducit. In casibus gravioribus frequenter, praesertim circa vesperem, repetendum est. Lavatio cutem emollit, et, si extremitatibus tantum admota est, circulationem facilem aequalemque in tota superficie corporis citat; et procul dubio quôque sanguinem absorptione diluit. In gradibus et stadiis morbi omnibus non alienum est. Quo violentior morbus, eo magis necesse est. Si vero situm erectum aegrotans ferre non potest, fatus in lecto est adhibendus.

Clysmata emollientia, in stadiis morbi omnibus, aptissima sunt ad alvum ducendam. In hoc stadio, symptomatis urgentibus, secunda vel tertia quaque hora, donec symptomata levata fuerint, repetenda sunt. Hic.

aqua

aqua pura, vel lacte commixta, utenda est. At, si alvi ductione opus sit, aliquid ex sale communi, et oleo vel butyro, adjiciendum est. Clysmata in regimine antiphlogistico omnino necessaria sunt. Non solum ductiorem facilem foccum putrium vel induratarum efficiunt, sed etiam in intestinis contenta, et exinde sanguinem quoque, diluunt.

Si symptomata inflammationem indicantia, ut pulsus validus et plenus, turgiditas et rubor faciei, inflammatio faucium, delirium, &c. ante eruptionem quamplurimum urgent, sanguinem mitti oportet. Symptomata enim levat, et eruptionem, si moratur ultra periodum suam, vel doloribus topicis violentis, vel calido regimine, febrem nimiam violentem citante, promovet. Si vero ista symptomata, eruptione progrediente, aut etiam desinente, non cessant, venaesectio non omittenda est, et interdum quidem bis terve repetenda. Symptomata venaesectionem postulantia saepius adultis atque juvenibus, magisque in

C

tempore

tempore verno, raro pueris, rarissime infantibus, incidunt.

Quum autem symptomata maxime periculosa non inflammatorii generis sunt, ut pulsus debilis et parvus, pallor faciei, deliquium animi aegroti e lecto surgente, anxietas, nausea, &c. emetica commodissime et tutissime, aut ante eruptionem, progressive ejus, vel etiam post finem, adhibentur. Tartarum emeticum praestat, utpote secretiones fere omnes ciēt, atque alvum fere semper facile subducit. Casus vomitionem requirentes, saepius infantibus et pueris, quam aetate florentibus, occurrunt.

Licet infantium convulsiones ante eruptionem, morbo benigno, frequenter proveniant, et indicia fere fausta habeantur, nihilominus quidem nonnunquam ferocissimae sunt, et aegrotum protinus e medio tollunt. Clysmata et semicupium, in paroxysmo adhibita, remedia et tuta et efficacia sunt. Opitata, in casibus gravioribus, per clysmata adhibenda sunt, atque cucurbitulae aut hirudines temporibus admovendae.

Dolores

Dolores pleuritici sanguinis missionem postulant; et, si quid venaesectionem prohibet, cucurbitulae vel hirudines parti dolenti applicandae sunt. Eodemque tempore semicupium et clysmata frequenter repetenda.

Adversus dolores abdominis colicam mentientes, dysuriam, et ischuriam, semicupii et clysmatum anodynorum usus multum promittunt; amovere autem aegrotum e lecto, et pedes super aliquid gelidum imponere, haud raro dysuriam et ischuriam summovet. At, si haec non ad ischuriam valent, catheter utendus est.

Dejectiones cruentae clysmatis et opiatis opportune levantur. Quorum usu puellam quandam curationem recipere vidi.

Urina vero cruenta difficillime curatur. Nihilominus quidem, etiam in hoc statu, acida, cortex Peruvianus, et opiata, non aliena videntur.

S T A D I U M II.

Opera danda est, in hoc stadio, ut febris compescatur, et suppuratio pustularum rite promovetur, ope aëris frigidi, diluentium, balnei, clysmatum, opiatorum, corticis Peruviani, et acidorum.

Omnino quidem necesse est, aegrotum in suo cubiculo aëre frigido puroque frui, atque aut lectum tenere, aut non, prout sibi velit. Veruntamen, ut, progrediente suppuratione, efferretur sub dio, vel etiam circumdaretur gelido vento a fenestra aperta, uti quidam monuerunt, mihi quidem alienum et periculosum esse videtur. Quoniam ex observationibus liquet, aërem gelidum cutem constringere, dolorem, inflammationemque pustularum augere, et suppurationem cunctari. Effecta fausta, quae ex eo in stadio primo morbi oriri consuescunt, in hunc errorem induxisse videntur.

Fovenda est cutis, ubicunque pustulae numerosae aut confluentes sunt; aqua tepida,
et,

et, si aeger in balneum descendere nequeat, panniculo leniter admovenda est; et ubi febris admodum urget, haud raro repetenda. Praeter effecta ejus leniendae febris, inducendique somni, dolorem inflammationemque pustularum levat, ac earum suppurationem promovet.

Clysmata emollientia quotidie administrari debent, ut alvus rite subducatur, quo quidem, tametsi non opus est, non omittenda sunt; utpote enim calorem, irritationem, febremque levant.

Opiata, propter eorum effectus anodynos, et soporificos, olim haud immerito concelebrata fuerunt. Enimvero quidem eorum virtutes in suppuratione promovenda, et in gangraena curanda, non nisi nuper agnitae fuerunt. Clariss. Syden. primus opii usum in variola instituit; sed de hac re multi haecenus non inter sese conveniunt. Pro axiomate enim diu habebatur, opiata stimulare, ideoque inflammationibus omnibus aliena esse. Facta quidem theoriis receptis adversantia aegre admittuntur.

Opiata,

Opiata, in hoc morbi stadio data, praeter eorum anodynos et soporificos effectus, febrem leniunt, suppurationemque pustularum promovent. Neque unquam eorum effectus stimulant, aut secretiones diminuentes, observare potui, quamvis quidem pluribus quam quinguaginta hoc morbo laborantibus, spatio paucorum mensium, ea administranda curavi. Quum morbus vehementior est, ab hujus ipso stadii initio danda sunt, donec pustulae sanescunt, et, bis die, mane scilicet et vespere, ut effecta unius doseos maneat, donec altera praebenda sit.

Corticem esse idoneum; et progrediente et declinante morbo, nequaquam quidem inficias ibo; at mihi tamen multo minus efficax quam opium esse videtur. Praeterea pueris, et iis inflammatione faucium laborantibus, vix adhiberi potest. Verisimile est quidem, quod opium et cortex commodius simul adhibeantur; quod vero experientia solum confirmari potest.

Acida, et mineralis et vegetabilis generis, haud immerito a multis commendantur; sed
sapor

sapor eorum ingratus, praesertim pueris, in idonea quantitate, ea adhiberi prohibet.

Inflammationem faucium difficultatemque deglutiendi levant, salivationemque promovent, injectiones in fauces per os et nares, os fovere aquae vapore, et eum respirare, cataplasinata emollientia cum camphora et opio ad jugulum admota, et subinde mutata.

Pruritus intolerabilis aegrotum urgens ad cuticulam evellendam, saepe, praesertim pueros, invadit, partes excoriatas gangraenosas relinquens. Hoc summa ope caveri debet; utpote enim, post talia mala, symptomata ingravescere observavi, mortemque haud raro insequi. Omnia stimulantia in hoc statu perniciosa sunt. Non melius equidem notum est mihi remedium, quam fovere frequenter aqua tepida cum lacte; manus quoque cataplasinatis cohibere debent.

S T A-

S T A D I U M III.

Hic conandum est summis viribus obviam ire feбри, intumescētiā extremitatū et sanationem pustularum promoverē, diluentibus, balneo, clysmatis, opiatis, epispasticis, cataplasmatibus, venaesectione, purgantibus, et cortice Peruviano.

Auctores quidam incisionem pustularum circa crisin proposuerunt, quod mihi quidem non satis consultum esse videtur. Periculum enim est, ne aër pustulis admissus, eas inflammaret et exulceraret; unde saniei absorptio et hectica oriri possunt. Praeterea, in casibus periculosis, pustulae raro humore explentur.

Quae supra diximus de usu aëris frigidi, balnei, clysmatum, et opiatorum, in stadio praecedente, ad hoc aequē pertinent. Notandum tamen, aëris frigidi applicationem locis excoriatis multo magis, ultra crisin, quam, pustulis suppurantibus, perniciosam esse: Quoniam partes excoriatas exulcerat, horrorem concitat, febremque auget.

Totum

Totum corpus, praecipue partes excoxiatae, ab aëre rite tegenda, et fovenda sunt aqua tepida cum lacte, donec pustulae sanescunt. Semicupium circa crisin frequenter adhibendum est, ad febrem levandam intumescen-
tiamque extremitatum promovendam. Al-
vum clysmatis quotidie eluere oportet. O-
piata bis die, mane et vespere, non omittenda
sunt, donec febris decesserit, et pustulae sana-
tionem receperint. Ex unius doseos neglec-
tu, lethum interdum incidere observavi.

Venaesectione ab auctoribus quibusdam mul-
tum collaudata fuit ad sanguinem a colluvie
putrida purgandum; haec vero sententia
nunc fere rejicitur. Nihilominus tamen, si
symptomata inflammationis topicae, ut phre-
nitis aut peripneumonia, in ullo morbi sta-
dio occurrunt, nequaquam negligenda est.

Epispastica, in variis morbi stadiis, ad fa-
ciendam revulsionem ad extremitates, mul-
tum commendantur. Res autem in dubio
est, an magis in hoc morbo stimulent quam
sedent. Praeterea, si exulcerentur, saniei ab-
sorptio et febricula hectica metuendae sunt.

Ob hasce rationes equidem cataplasmata emollientia multum praeferimus; et, si stimulo opus sit, cura ne exulcerent habita, si napi aliquid adjiciendum est. Haec manibus pedibusque paulo ante crisin admovenda, et subinde mutata, donec desinat febris, et tumescant extremitates, continuanda sunt.

Purgantia multi circa crisin, facie arescente, proposuerunt; iis vero nequaquam assentior; quoniam purgantia, ~~in~~ hoc tempore administrata, intumescantiae extremitatum obstare, et diarrhoeam ciere opinor. Post intumescantiam extremitatum, et pustulis ex magna parte arescentibus, purgantia non aliena sunt. Eorum vero post operationem opiatum dandum est, ne hypercatharsis superveniat. Purgantia quidem et opiata simul apte adhibentur; operationem enim purgantium minime impediunt, atque torminibus et diarrhoeae, quae saepe superveniunt, opportune occurrunt.

Partes excoriatae et exulceratae accurate ab aëre unguento emolliente contegi debent. Atque, ne exulceratio procedat, un-

guento

guento frequenter renovato, sanies acris aqua tepida cum lacte eluenda est.

Hæcicam ulceribus ortam diarrhoea dyspnoeaeque fere comitantur. Quod ad ejus curationem pertinet, cortici et opiatidis potissimum confidendum est; num purgantia commode adhibeantur, nescio. Attamen vero clysmata administrari oportet, quia ad intestina, eorum contenta putrida et irritantia diluendo et evacuando, derivationem imminuunt; quoties vero dyspnoea gravior fit, sanguis cucurbitulis vel hirudinibus, aut etiam ex brachio, mittendus est.

Ophthalmiae, quae saepe variolae supervenit, diu oculos a luce tuendo, donec hi vigorem recuperaverint, occurrere oportet. In ejus curatione, luce evitata, opiata et purgantia mercurialia adhibenda sunt.

Apostemata et phlegmonae, post hunc morbum incidentes, more solito cataplasmatibus emollientibus rite tractari possunt.

DE VARIOLÆ INSITIONE.

Quoniam variola omnium morborum latissime et inimicissime mortalibus grassatur, et nunquam nisi semel per vitam quenquam infestat, atque, utpote quidem insitione omnino benigna et innocua fit, omne conamen ad cognitionem hujus felicissimæ artis publicandam, minime ingratum erit bonis.

Inoculatio per scalpellum methodus certior virus communicandi esse videtur: Minus quoque fere exulcerat. Virus recens, et id quod in scalpello per dies viginti conservatum fuit, et id quoque quod ex pustulis diei sexti, septimi, octavi, aut noni, exceptum, eandem vim habere observavi.

Quidam puncturas duas tresve in brachiis utrisque facere monuerunt, quo certiores forent vas aliquod absorbens vulnerari. Hoc vero nequaquam fieri oportet, quia ulcus nimis grave concitare solet. Nisi in infantibus, qui minus apti sunt ad virus

rus suscipiendum, punctura una in uno brachio solum facienda est.

Die secundo inoculationis punctura adeo sanatur, ut similis frustulo pili subnigri in cute haerente videatur.

Die tertio, per lentem conspecta substantia flava, puri siccato similis, circa puncturam adhaerens, videri potest.

Die quarto, substantia flava, oculis nudis conspicua, et rubedo flavescens, super puncturam apparent.

Die quinto rubedo magis conspicua, tumidula, tactui firma, saepeque pruriens; circa partem inflammata, pustula interdum erumpit; quod vero in unoquoque quarto vel quinto aegrotante observavi.

Die sexto, inflammatio, et tumor circumscriptus, parvam phlegmonen mentientes, cujus summum subalbidum quasi suppuratur. Dolor acutus, a tumore ad axillam tendens, qua bubones oriuntur. Aegrotus interdiu languore et lassitudine, vespere rigore et horrore, saepe afficitur; atque nocte somnus interruptus, artuum et lumborum dolo-

res,

res, calor auctus, fitis, et interdum capitis dolor, succedunt; ea autem mane plerumque evanescunt.

Die septimo, dolor et inflammatio tumoris augefcunt, bubones quoque magis conspicuae, fere dolentes. Spatium albidum, in summo tumoris magis extensum, et humorem ferosum fere exudans. Symptomata febrilia violentius, quam nocte antecedente, vespere redeunt.

Die octavo, tumor fere ulcus cavum fit, quod sanationem, non nisi post curationem pustulae, admittit. Paucae pustulae cum levamine symptomatum erumpunt. Nihilominus tamen iterum vespere vehementius quam antea recurrunt. Id, quantum licuit observare, perpetuum est, saltem in casibus omnibus, qui plusquam viginti pustulae habent.

Die nono, pluribus pustulis erumpentibus, symptomata levantur. Exacerbatio modica noctu rursus accidit; at, paucis pustulis plerumque novissime erumpentibus, penitus abit; die primo eruptionis paucae, secundo plures,

plures, tertio vero pustulae paucissimae, erumpunt.

Secundum systematis irritabilitatem, aut alias causas, inflammationis progressus accelerari aut retardari potest. Attamen symptomata semper in ordinem, quem posui, et ex magna parte, in diebus memoratis, occurrunt. In infantibus, pustulae non ante diem undecimum fere proveniunt; at in aliis eruptio plerumque die octavo incipit. Atque, quantum mihi notum est, puncturae suppuratio bubonesque semper paulo ante febrem videri possunt. Denique, punctura spatio sex dierum plerumque suppuratur, deinde bubones, et mox postea febris, subsequuntur, atque ex intervallo circiter quadraginta horarum eruptio incipit.

Ex his observationibus verisimile est, virus in punctura ortum, et in sanguinem absorptum, morbum efficere, et id quod insitione inditur, modo viri adinstar, suppurationem concitare.

Siquidem haec theoria pro certo habetur, quaestionibus responsa sequentibus facile sese offerent.

offerent. Quid causae fit cur virus insitum per dies quinque aut sex, iners in sanguine manet, vel tam lente in eum transit? Quomodo tam exigua pars viri, quam insitione inditur, talia effecta per totum systema concitare possit? Quamobrem variolae febris insitae vehementior fit post eruptionis initium, quoniam spontaneae febris, morbo benigno, simul atque eruptio incipit, maxime levatur, et in ejus progressu semel aut bis parum cietur?

Si variola viro in punctura orto efficitur, qualitasne an quantitas ejus viri morbum variet? Gradum inflammationis proportionalem morbo fuisse, plerumque me observasse opinor. Indolesne viri insiti puncturae inflammationem afficiat? Possintne cataplasmata aut alia applicata viri indolem mutare? An ex sanie in ulcere orta, et in sanguinem absorpta, apostemata frequenter, declinante morbo, oriri videantur? Operane danda sit suppurationem gravem cavere, et quam cito fieri potest ulcus sanare?

“ Se-



